

# من الإعلام شهادات الأهالي في يناير وفبراير 2019



قبل الإنقلاب كان الأطفال يرسموا عصافير بتطير ، وورود تتفتح ، والعباب وفرحة سرقة الإنقلاب منا كل شيء حتى فرحة الأطفال فأصبحت رسوماتهم تعبر عما يعيشونه من ألم بفقدان ذويهم داخل سجون الظالمين ، فاللهم عليك بمن أفقدهم فرحتهم وحرمتهم من آبائهم <http://bit.do/eHMMx>

## عبد الرحمن كمال

عبد الرحمن كمال كده بقاله تقريبا سنة وكام يوم واخذ براءة ولحد دلوقتي لسه مرجعش لأهله....باباه خلال السنة دي تعب جامد جدا من كتر الهم وعمل عملية في عنيه الاتنين وسكره دائما عالي وهكذا ضغطه...مامته لسان حالها حسن الظن بالله لكن قلبها بينفطر بتبعت تقول فكروا الناس بابني واحنا بنقولها محدش عمره ينسى مهندس الخير واحنا واثقين تماما وبنبشرها انه هيخرج قريبا لأنه صنائع المعروف تقي مصارع السوء يا أمي وعبد الرحمن كان مشهور بصنائه وأسألوا اهل القرى عنه سواء صعيد او فيوم ومعظم قرى مصر وأسألوا الاطفال الأيتام عنه...كلنا ثقة انه كل الناس دي بتدعيه وكلنا ثقة انه هيرجع لأهله سالما



#عبدالرحمن\_كمال\_فين

#مهندس\_الخير\_فين؟ <http://bit.do/eE25U>

زوجي كان مختفى لمدته 35 يوم ولما ظهر حكى لى بعد ما خرج من سجن العزولى الحربى ان فى ناس هناك بقالها اكثر من 3 سنين محدش يعرف عنهم حاجه مدفونين فى زنازين لا بدخلها الضوء ولا يعرفوا الوقت ولا بسين خيش على جسمهم ولا اهلهم يعرفوا هما احياء ولا اموات  
<http://bit.do/eE25U>

## فاطمة الزهراء زكريا ام تائر

نفسى أصرخ بجد واقول حرام حرام حرام اللي بيحصل لزوجي فى التاديب بالعقرب حياة زوجي فى خطر وبيموتوهم بالبطنى.. سافرت النهارده بعد صلاة الفجر احطله أمانات وعلاج اللي معرفش هيدخل وللا سافرت وعلي امل اطمن بأي وسيله كان بيني وبين زوجي شوية بوابات ومش عارفه أشوفه كالمعتاد من سنتين منذ منع الزيارة رحت ورجعت فوق ال50 مره من غير مشوفه حاولت اشوف اي حد من اللي كنت بشوفهم ببشتغلوا فى العقرب ايام الزيارة وفعلا لقيت رحت بسرعه اكلهم ولكن للاسف اتنقلو.. انتظرت اشوف اي عربية ترحيلات خارجه اسأل ان كان فيها حد من العقرب لكن فى تعذرات ومش بينزلو جلسات اليومين دول.. وانا فى الطريق واحده كلمتني وعرفت أنهم واخدين

منهم البطاطين في عز البروده دي والاكل بيدوهم الاكل اللي يخليهم يعيشوا وواحد تانيه قالتلي  
اخوها في التأديب ومانعين عنهم العلاج رغم أنهم تعبانين جدا  
حالتهم بتسوء وبتدهور والله العظيم حياتهم في خطر  
اقل حق ليهم انكم تكتبو عنهم مش تستنو لمايموتو وتكتبو  
ادعو ربنا كثير

26 يوم ولازال زوجي في التأديب 26 يوووووم دون غطاء دون علاج وبفتات الطعام واوضه اسمر في  
اسمر وازازة مية

يعني لومموتهمش يخلو صحتهم تتدهور رحمتك يارب رحمتك  
غرم حلمك يارب

اللهم احفظ زوجي #خالد\_حمدي ومن معه

اللهم اني استودعتك زوجي فاحفظه بحفظك

اللهم حرية لزوجي والمعتقلين

<http://bit.do/eETed>

### نقلا عن أخت عبد الرحمن :

اخويا عبدالرحمن خرج رايح شغله في مدرسة ابن حزم يوم الاثنين  
الموافق 2018/12/24 الساعة 9:45 ص لقيتو بيكميني من رقمه  
الساعة ٢ ظهرا بيقولي حد هيجلي من المدرسة عندو ياخذ تلفونه الثاني  
علشان نسية ومحتاج منو حاجات تخص المدرسة وفضلت معاه على  
التلفون ٦ دقائق وانا بدور على الفون بسألو انت كويس؟؟قالي، ايوه  
قلتلو طب ماتيجي انت تاخدو، قالي عندي حاجات في المدرسة بخلصها  
قلتلو طيب انا اجيبهولك قالي لا اديه لي هيجيلك البيت!!!  
لقيت الفون وقفلت معاه، واديتو لخويا يديه لي جاي من المدرسة،  
قالي ده حد كبير مش تلميذ!!!

كلمت عبدالرحمن تاني وقلتلو اللي موجود اسمو ايه قالي ادهولو  
وخلص قولتلو لازم تقولي اسمو ياما اجي انا اديهولك قالي اسمو محمد

محمد ده خد التلفون الساعة ٢،١٥ وبعدها ب نص ساعة تلفونات

عبدالرحمن ال ٢ اتقفلو! روحنا سألنا في المدرسة قالولنا انو مراش المدرسة اصلا اليوم ده!!!

وواحد من الجيران قالنا انو شاف ناس بزي مدني ماشين معاه ويركبوه عربيه !!!

كلما المحامي بالليل يسأل عليه في القسم قال مش موجود هناك !!!



عملت تلغرافات ثاني يوم للنائب العام والمحامي العام لنيابات شمال الجيزة ولمكتب حقوق الإنسان  
ولوزير الداخلية أن اخويا مختفي دون أي سند قانوني،

وخذت صورة رسمية من التلغرافات دي

انا بكتب الكلام ده علشان اثبت حالة وعلشان اخويا ميتلفقلوش اي تهمة وعلشان لو حد يقدر  
يساعدنا يساعدنا وعلشان قلب امي المحروق عليه وعلشان قلة الحيلة الي بقينا فيها، وعلشان دولة  
القانون والمؤسسات ازاى يتخطف الناس فيها من الشوارع وميبقالهمش اي أثر!!!

وعلشان الناس كلها بتقولي اصبر ومنتكلمش لحد مايظهر وعلشان محدش عارف ممكن يحصلوا ايه لا  
قدر الله!!!

انا بناشد كل الناس واي حد واي مسؤل انهم مايقبلوش ده على اهاليهم ولا قرايبهم، انهم يساعدونا  
ويخرجوا اخويا المشهود له بالاحترام والادب والسيرة الطيبة بين الناس وكل الي زيه، اخويا مدرس  
يربي أجيال ومش مجرم وملوش اي نشاط سياسي، وسبق قبل كده قوات من الشرطة جم البيت  
واقتموه بالليل وخدوه يومين وخرج علشان معلهوش اي حاجة!!!

كل الناس بتقولي منتكلمش علشان ميتأزيش بس لو اتأزي محدش هيعملو حاجة!!!

حرام كل شوية تعب وبهدلة وظلم من غير سبب، حرام الاحاسيس الي معيشنا فيها دي والرعب  
والخوف والقهر وقلة الحيلة من غير اي سبب!!! <http://bit.do/eE28K>

6 يناير

اية الله اشرف محمد السيد

اية الله اشرف محمد السيد مواليد الخانكة 95/2/26 في يوم  
2018/10/3 الساعة الواحده صباحا تم اقتحام المنزل بطريق وحشيه  
دون مراعاة لحرمة البيت تم كسر باب الشقه علينا وانتشرت قوه  
داخل البيت وكنت متواجده انا وبناتي وولد في المنزل وقاموا بتفتيش  
البيت بطريقه همجيه وتكسير ما به وتنزيل الملابس من الدولايب  
وتكسيورها وتم كسر باب غرفه البنات وطلبت ابنتي الصغرى دقيقه  
توقظ اختها لانها نايمه وتلبسها لانها بملابس النوم صفعها الطابط  
بالاقلام على وجهها ودخل على اية وفزعها من النوم وكانت مستغرقة  
في النوم لانها كانت تعبانه من دور برد شديد تم التحفظ على



الموبيلات والاب توب واخدوهم وطلبوا بطايقنا واخدوها دونوا بيانتنا  
ثم اعطوها لنا وطلب من ايه تعالى معنا صرخت في وجهه ليه قال لى هنسالها سؤالين وعشر دقائق  
وترجع وتم اقتياد ابنتي امام الجيران وركبت بوكس وذهبنا للسؤال عليها في القسم انكروا وجود حد  
بالاسم دا

ايه بنتي محبوبه جدا من كل اصحابها كل من يعرفها يعرف ايه بصاحبه الابتسامه ويعرف اخلاق ايه  
الحمد لله مشهود لها من كل من يعرفها بهدوها واخلاقها الطيبه .. ايه من يوم ما اخدوها واخواتها  
حزاني عليها لانها كانت ام لهم حتى اختها كانت رافضه تدخل الامتحان حزنا على اختها ... ايه عندها

مشكله ف. القلب وكان مفترض في شهر 10 اننا هنعمل اشعه ايكو على القلب لانها كانت بتاخذ بنسولين طويل المدى لانتهاء مفعول العلاج وكانت لا تستطيع المشى لمدته من وجع رجلها... بنتي خريجه معهد تكنولوجيا قسم صحافه واعلام ولم تعمل بالاعلام اطلاقا.. ليه اخدوا ايه وحرمونى منها وحرموا اخواتها منها... عملت تلغرافات كتيره جدا الى وزير الداخليه والنائب العام والمحامى العام ونائب وزير الداخليه لحقوق الانسان وعملت لرئاسه الجمهوريه ومنظمه حقوق الانسان بمصر ومدير امن القليوبيه ورئيس نيابه الخانكه وللأسف لم يتم اى رد فعل... بنتى عملت ايه علشان تخفوها دا كله بنتى فين؟! <http://bit.do/eETft>

7 يناير

### سارة خيرت الشاطر

الناس عماله تقول الجو برد طيب انتوا عارفين ان السيبي وداخليته مانعين ندخل جاكيت او بلوفر او اى لبس اساسا لأبي وحسن والمعتقلين في البرد ده ولا حتى هم بيوفروه ليهم في السجن بيلبسوهم بدلة السجن التي لا تغني.. مفيش مايه سخنه ولا حتى حاجه سخنه يشربوها تدفيهم.. ياتري جسمهم اعتاد علي البرد وعظمتهم مستحمله زي ما احنا اعتادنا علي الدفا والبطاين وكوباية الشاي السخنه...

<http://bit.do/eE29p>

### إبنة ا. هدى عبد المنعم المحامية

صباح الخير عليكي يا امي اينما كنت ..

انهاردة اليوم ال ٧٠ .. بكتب الرقم وانا مش مستوعبة ازاي عدى ٧٠ صباح .. ٧٠ مساء .. ٧٠ حدث .. ٧٠ كل حاجة عدت وحصلت وانت مش موجودة يا امي .. ٧٠ يوم شوفتك فيهم ٢٠ دقيقة ومش مسموحلي حتى انطق واعبر عن غضبي .. ٧٠ يوم واحنا مضطرين نقبل اى حاجة عشان خاطر انت في ايدين ناس معندهمش اقل درجات التمييز .. فاضل ١٩ يوم على عيد ميلادك يا امي ..



السنين اللي فاتت كنا بنفضل نرتب من وراكي انا وبابا واخواتي عشان نعمل كل حاجة تفرحك في اليوم ده السنة دي مش عاوزين اكثر من انك تبقي معانا ووسطنا ونخبيني من الخلق كلها ..

يا ماما الجو برد اوي وانا كل شوية اقلع الجاكت واجرب احساس البرد لاني خايفة مكنش حسة بيكي ..

يا ماما الحياة كسرتنا اوي بغياباك عننا ..

يا ماما قلبنا اسود اوي يا ماما ..

يا ماما انا قلبي بيوجعني بجد!

انا في حفرة في روجي بتوسع كل يوم بغياباك ..

بقيت بقسى على كل الناس ..  
بتنرفز من اقل حاجة ..  
مفيش حاج في الدنيا فارقة معايا خالص ..  
مش عارفة احس حاجة خلاص ..  
بموت بالبطيء يا امي ..  
طيب انا مستعدة اعمل اي حاجة في الدنيا وتطلعي وتبقي كويسة حتى لو خدوني وخفوني بدالك  
ومطلعونيش ابدا ..  
يا ماما انا بفضل انا دي عليكى وانا خايفة من كتر ما بطلت انده عليكى بقيت بجرب في الهوا كدة ..  
انا ببقى سايقة العربية وانده عليكى بصوت عالي زي المجانين ..  
يا ماما انا عقلي بيروح خلاص والتفكير تعبني اوي يا ماما ..  
٧٠ يوم من غير حياة يا ماما .. ٧٠ يوم موات تام يا امي .. <http://bit.do/eE3av>

11 يناير

منار الطنطاوي

انتى ملكيش غيرى كل ولادك هبتجوزوا و يستقلوا بحياتهم و انا الى  
هبقالك نقعد سوا و انا يا ستي مش هقول عليكى عجوزة و لا بتمشي  
على عصاية هسندك .

و انت مش هتعجز لا انا هفضل طول عمري شباب. الشباب شباب  
الروح و العقل مش الجسم. بقيت لوحدي يا هشام حتى وولادنا  
معايا من غيرك وحيدة . حتى لو عملت اى انجاز مش بفرح لاني  
اكتشفت ان الفرحة كانت لازم تبقى فيها. حتى لما كنا نزل مع بعض  
كنت اقولك نفسي اقوى كده و اخد منك موقف و ازعل حتى يومين.

كفاحنا طول السنين علشان لحظة ونس بينا هادم اللذات و مفرق الجماعات استخسرنا فينا. داخله  
في اربع سنين من غير وجودك جنبي. وحشتنى قوى و جه البوم الى اكتبلك على الفيس علشان تشوفها  
بعد ما تخرج لان كل شىء في حياتنا الوقت بيمر عليه يطمسه و ننسي و انا مش عايزة انسي ملامحك و  
لا كلامك و لا احلامك. بكتب علشان محدش ينساك و فعليا محدش قادر ينساك لانك كنت مؤثر في  
حياة كل الى تعامل معاك.

وحشتنى و هفضل اكتب لغاية لما تطلع او انا اموت.

#هشام\_جعفر

11 يناير 2019

<http://bit.do/eFbe5>



## نور خليل

المعتقلين المضربين عن الطعام بسجن طره تحقيق من يوم ٢٥ يناير حتى الان  
إسلام خليل، أحمد صبري أبو علم، إسلام غيط، شريف العفريت، جلال البحيري، عبد الفتاح البنا  
وبسجن القناطر يدخل شادي الغزالي حرب في إضرابه لليوم الثامن أيضا  
ومازال الصحفي معتر ودنان مضرب عن الطعام لأكثر من ٣٠ يوم للمطالبة بنقله من سجن العقرب  
والسماح لاسرته بزيارته . تضامنوا معهم ومع كل معتقلي الرأي. <http://bit.do/eHHBx>

12 يناير

## سارة خيرت الشاطر

كل ما قلبي يوجعني واحس بالقهر والحزن لغياب أبي وزوجي وحسن وعائشة وأزواج اخواتي عنا قهراً  
وكل ما باشوف ولادنا بيكبروا وبيعيشوا محرومين هم كمان من ابهاتهم وعائلاتهم باصبر نفسي  
بالآخرة.. المشهد باتخيله في ذهني يوم القيامة ومن أصغر عسكري لأكبر رئيس واقفين لحسابهم  
وبينهم وبين دخول الجنه مسامحتي حتي لو كل الناس سامحتهم هاطلب من ربنا الحكم يدخلهم النار  
ولايسامحهم في حقي ابدأ.. هايترجوني اسامحهم وانا هاتشفي بعذابهم عن كل ليله اتحرمت فيها من  
حياتي الطبيعیه .. عن حرمانني من وجود أبي في كل مراحل حياتي تقريبا فلم انعم انا واخواتي به في نجاح  
او تخرج او خطبه او زفاف او حتي في ولادة اولادي الي كبروا دلوقتي بيعرفوه فقط من الصور.. عن  
زوجي الي ساب بنتي في عمر سنه وانهارده بتتم ست سنين من غيره .. غاب عني وعن اولادي خمس  
سنوات الي الان بدون سبب الا انه متزوج من ابنة خيرت الشاطر..

عن حسن الي حرموه طفولته وصحبة أبي وحرماننا صحبته دلوقتي وبنفتقده في كل وقت باتخيل  
فرحته وضحكه وهزاره وروحه الي حبسوها في زنزانه ظلم بس لأبوه.. عن حزن اولاد عائشه نور  
وحمزه وعبداللله.. عن اولاد مصطفى واحمد درويش الي كبر ولادهم وممنوعين حتي من الزياره.. عن  
تروعينا ومعاناه كثير محتاجه آلاف من السطور لشرحها..

باتخيل قوات الأمن بيتحاسبوا يقولو مين دي منعرفهاش وانا باقول لهم انا كمان مش عارفه اساميكم  
ولا حافظه اشكالكم ويمكن مش شفتكم كلكم بنفسي لكن ربنا عارفكم وشاهد علي ظلمكم وانكم كنتم  
اداه في ايد الظلمه شتتوا عيلتنا بتبرير انكم مأمورين فحولتوا كل لحظات حياتنا حزن وقهر فربنا العادل  
هايدمر اخرتكم زي ما أفسدتوا دنيانا ..

اللهم كل من ارتدي لهم زيا او اطاع لهم أمرا زد في عذابه فلا يخرج من النار ابدأ

<http://bit.do/eFr6n>

## عن مصعب نصار

هبة شقيقة #مصعب\_نصار والمختفي قسرًا لليوم السادس علي التوالي نشرت هذه الصورة وكتبت عليها التالي..



"ليه مقولتليش وانت بتوصلني الامتحان يوم السبت انها هتكون آخر مره ؟  
كنت زودت ف الكلام شوية ، وكنت سألتك ع كل الأسئلة اللي عندي ، او كنت  
حتي حضنتك جامد وانت بتسلم عليا♥

طب بص بكرة الخميس ، الخميس اللي كنت بستناه م الاسبوع للاسبوع عشان تيجي واشوفك ،  
هنستناك بكرة تدخل علينا وقت ارطغرل عشان نسمعها مع بعض ☺

وعشان انا عندي امتحان السبت ، وانت وعدتني هتذاكرلي الرياضه اللي مش فهمهاها ☹

طب بص خلاص انا والله جببتك شيكولاته النهارده وكنت عملا لك مفاجأة عشان تيجي بكرة تلاقياها

طب الخروجة اللي كنت واعدني هتخرجهاني بعد الامتحانات♥

طب خلاص تعالي بس ومش هنخرج ولا هتذاكرلي..

دا انا كنت حتي بقول انك اول ما تيجي الأسبوع دا هحكيلك ع حاجات كثير واجعاني..

وانت بتكلم ماما امبارح ، فضلت اقولها قوليله اني "بحبه جدا" بس هي مرضيتش وبعدها قالتلي انك  
سمعتني .. ياريتني كنت اخدت التليفون وقولتلك اني بحبك وانك اغلي حد ف حياتي بنفسي♥

ليست التيشرت الابيض بتاعك اللي انت كنت بتحبه وكنت مستنياك بكرة عشان تيجي وتخانق معايا  
بهزار ذي كل مره..

كنت لسا بقرأ رسالتك اللي كتبتها لي اول ما اعتقلت المره الاولي وبقول لمصطفي بص كاتبلي "قطتي  
الصغيرة "

وبقوله بص درج مصعب مليون رسايل مني..

هنرجع نتكلم رسايل تاني ، ومش هحكيلك ع الحاجات اللي وجعاني الفترة دي♥♥

فاكر يوم ما جببتك المحفظة والبلالين عشان كنت مدايق شوية ، وانت بتسلم عليا وقتها قولتلك خد  
بالك من نفسك عشان لما جببتك محفظة المره اللي فاتت اعتقلت ، فضلت تضحك وقتها بس طلع  
احساسني صح(((

طب ي مصعب انت كنت واحشني جدا والله♥

متأكده جدا ان كل اقدار ربنا خير والله ، بس كنت واحشني جدا .

يارب مش معترضين ابدًا وربّي ، اللهم احفظه ورده سالما غانما عما قريب

مش مسامحه اي حد كان سبب ف بعدك عننا ي مصعب والله♥♥♥ .. <http://bit.do/eFsnw>

## عن حسن البنا

حسن البنا وهو مبتسم : وبعدين يا أسطا في الحوار ده أنا بقالي سنة في السجن ومش عارف ليه؟ هفضل هنا بقية حياتي ولا ايه؟  
-شوية وقت وهيعدوا يا اسطا، هنعمل ايه بس  
-ماهو مفيش حاجة تتعمل، بس حياتنا وعمرنا شوية وقت أصلا...  
محادثة قصيرة في الزيارة مع الصديق حسن البنا انتهت بحضن وداع وبدون كلام



حسن البنا صحفي تم القبض عليه يوم ٤ فبراير ٢٠١٨ وهو راكب ميكروباص مع صديقنا مصطفى الأعصر وفضلوا مختفين اسبوعين بعدها ظهروا كمتهمين في نيابة أمن الدولة العليا بتهمة نشر اخبار كاذبة على ذمة القضية ٤٤١ حصر أمن دولة <http://bit.do/eFskp>

15 يناير

## والد عيسى، المواطن الألماني

أني فخور بابني عيسى  
عيسى لم يفعل شيء مخالف او غلط  
فهو شخصية هادئة، مؤدب، صادق  
قلب ابيض لم يتلوث بعد  
اعتذر إلى والدي الذي حرمه السيسي من رؤية حفيده مدى الحياة  
لا شك أن التجربة قاسية لا تناسب شخصيته  
لكن الحمد لله على كل حال  
اقول الي جيش السيسي  
انت فاشل في الوصول إلى داعش بدون بوصلة  
طيب انت اخدت البوصلة الخاصة بي من ابني الصغير .  
الآن نريد أن نرى انتصارات جيش السيسي بعد الحصول علي البوصلة التي ستوصلك إلى داعش  
نصيحة الي السيسي وجيشه  
يوجد بوصلات في مصر سعرها 3.5 جنية، وسعر الخريطة 1.5 جنية، يعني ٥ جنيهات توصلك إلى داعش، مش مضطر تنتظر أنت وجيشك تلميذ ألماني ينزل عطلة حتي تأخذ منه لعبته .  
بالمناسبه، اسعار البوصلة في مصر أرخص من موقع امازون.

عيسى إن شاء الله اقوى منكم جميعاً  
تحيتي لكل شريف، وقف مع عيسى

<http://bit.do/eFWzt>

17 يناير

### اخت المختفي القسري بكر

ممکن تکنونوا راميينه ف أي مکان وقافلین علیه لا بیستفاد منکم ولا بتستفادوا منه غیر انکم بتعذبوه مثلاً کل شویه.. أخویا بری من کل حاجه ومیستاهلش أي ضرب ولا یستحمله اصلاً انا عارفاه دا غلبان وطیب ومبیعملش ای حاجه ف حیاته لا مفیده ولا غیر مفیده (مبئحسش بیه ف البیت ولا لیه ای صوت غیر لو روحته انکشه) ممکن یقعد ٢٤ ساعه ف اوضته مبیتحركش منها یذاکر ولا یقرأ ولا یعمل ای حاجه وینسی یاکل او یکسل یشرب لو مجیبتلوش یاکل ویشرب بس عمره ما نسی یصلي، أكلتوه طیب شربتوه،



ولا فضل شهر کدا لا أكل ولا شرب!!

انا عارفه انکم مستحیل هتستفادوا منه بحاجه عمره م هیقدر یساعدکم بأي حاجه لانه اساساً مبیساعدش نفسه بحاجه.. بس انا بستفاد بیه بحاجات، انا محتاجه معایا، هو ابني المدلل مهما کبر، بهتم بیه وبشارکه غصب عنه لانه انطوائی جدا ف نفسه.. انتوا ممکن متکونوش فاهمین العلاقه بینا ازای، بس انا بحبه أكثر شیء ف الوجود وغیابه فارق بالنسبالی حد السماء.. یا بکر لو سامعنی او هتشوف الکلام دا بالله علیک تطمني من أي جهه انا مبطلبش غیر صوتک.. یا بکر احنا هنا مش عایشین والله.. یا عالم ظلّمه أخویا معملش أي حاجه ف حیاته.

خدوا عمري کله لو دا هیفرج عنه. حرام علیکم الوقت دا کله حرام دا الجو تلج هو هیستحمل السقعه تاكل ف جسمه کدا ازای دا جسمه ضعيف وعضمه بیتهبه من البرد!!

قولولي هو فین وانا هاجي اجیبله اکل وشرب وهدوم حتی لو کان ف المریخ لکن ٢٩ یوم کثیر کثیر والله.. الیوم بیعدی علیه ازای دلوقتی هنستی ازای احنا !! کفایه کدا مشبعتوش ضرب فیه!!!!

أخویا فین یا سیسی!!!

أخویا فین یا عالم!!

یارب انقطعت أخباره عنا وانت وحدك عالم هو فین دلنا علیه یارب منک الرجاء نحن الضعفاء  
ووحده قوی عزیز .. <http://bit.do/eFWBM>

صباح الخير يا عبدالله

اتمنى أن زنانتك تكون فيها بعض من الدفء اليوم والكثير من الحب  
يوم ميلاد حبيبتك الصغيرة التي لكنت تحظى الآن بيوم مميز لا شك مليء  
بالحب والقبلات والأحضان والرفرفة بلا جناحات بين يديك  
عالية عبدالله



أدرك معنى أن يرزق قلب حاني مثلك بابتلاء البعد عن قطعة من روحه حرفيا

لا مجازا

"متزعلوهاش" كلمتك المعهودة كل زيارة

توبيخك لي لأني ابكيها بعض الأحيان بقله عقل مني

واعلم أنك تقصد يكفيها ما مرت به وحرمانها منها

كان ليكون يوما عظيما

اتمت الصغيرة عامان

اطفئنا شمعة كعكتها في الزيارة ودقائق الحب القليلة

كنت تطعمها أنت وهي تطلب منك المزيد

"بابا ده" وتضحك أنت كطفل في عامه الثاني فرحا

لا اعلم يا حبيبي إن كان سيسير اليوم مثل ما كان مخطط له أم ستعيب بنا الدنيا فتعاندها أنت

بابتسامتك وقله حيلتك فتنتصر كما انتصرت عليها دوما

لكن اعلم أن لولا ما حدث في ٢٤ مارس الماضي لكنت عالية الآن تحظى بذكرى يوم ميلادها الثاني

الأفضل على الإطلاق

أو بالأحرى كانت ستحظى بحياة طبيعية(:(

حبيبي نكافح لجعله يوما جميلا لعالية عبدالله

نكافح لجعله لمحبة منك

<http://bit.do/eFWCm>

17 يناير

انجاد البرعي المحامي يحكي تفاصيل منع البطاطين عن متهمي "إهانة القضاء"

ترددت قبل أن اكتب فأنا لم استأذنها ولكنني تغلبت علي تردددي وقررت أن أكتب.

النهادره باتصل بالاستاذة وفاء المصري، زوجه صديقي الأستاذ محمد منيب المحامي بالنقض والامين العام الاسبق للمنظمة المصرية لحقوق الانسان وعضو مجلس نقابه المحامين السابق، والمحبوس مع أصدقائي منتصر الزيات وحمدي الفخراني وعبد الحلیم قنديل علي ذمة القضييه المعروفه إعلاميا بإهانة القضاء.

كنت اطمئن علي حالة منيب لانه كان عنده مرض خطير سافر للعلاج منه في فرنسا ويتابع حاليا باشاعات وتحليل وغيرها، لكن صدمتني الاستاذة وفاء بما يتعرض له الزملاء الكرام في محبسهم من تضبيقات.

مفيش اكل من الخارج الا ليوم واحد، الزيارة كل اسبوعين ١٠ دقائق بس، رفضوا إعطاءها اوراق التحاليل التي اجريت لمنيب لعرضها علي طبيبه خارج السجن لان اوراق السجن ممنوع تخرج بره!!

كل هذه التضبيقات ارفضها ولكن يمكن ان اتفهمها واعديها كمان، لكن صدمتني بقولها "ان السجن مش عايز يدخل للناس بطاطين زياده وانها اضطرت تعمل مشكله كبيره لحد ما دخلت بطانية واحده لمنيب اما منتصر الزيات فلم يسمحوا لابنه ولا آخرين بادخال بطاطين!

الحوار ده كان النهارده الساعه ٤ بعد الظهر . اندهشت .. انا افهم التضبيق علي الناس لاذلالهم ولكن لا افهم منع ادخال بطاطين او ملابس ثقيلة لناس كبار في السن او حتي شباب في اجواء عاصفه بارده لان هذا في زعمي جريمة شروع في قتل، فلو اضفنا لذلك ان الناس دي محبوسين احتياطي لحد دلوقتي يعني من المفترض انهم ابرياء حتي يقضي عليهم بحكم نهائي، ولو اضفنا لذلك ان اعمارهم كبيرة نسبيا يعني تدور حول الستين تقريبا، فده يؤكد ان الموضوع مش تضبيق ولا اذلال لا دا شروع في قتل.

طبعا اتصلت بحافظ ابو سعدة الذي وعد بالتدخل والمحاولة، وكمان وفاء المصري اتصلت بالاستاذ محمد فائق الذي يحاول من جانبه قدر المستطاع، لكن تبقي المشكله ايه السبب في منع ادخال ملابس ثقيله او بطاطين لمحبوسين احتياطيا في جو بارد كهذا؟ ما الذي سيحدث داخل السجن لو تم ادخال تلك البطاطين اليهم؟

التعذيب مش انك تضرب واحد، التعذيب انك تسببه يموت من البرد أو من قلة الاكل او من ظروف انسانيه صعبه داخل السجن او تحرمه من العلاج، وده إلى جانب أنه تعذيب فهو جرائم جنائية.

من المفترض أن النيابة هي المشرفه علي السجون فهل تقوم بدورها ؟ هل تحقق في تلك الشكاوي؟ هل يئس الناس منها فتوقفوا عن الشكوي باعتبار أن الشكوي لغير الله مذلّه؟ أين قطاع حقوق الانسان بوزارة الداخلية؟ أين قطاع حقوق الإنسان بمكتب النائب العام ؟ لكن المهم أين نقابة المحامين مثلا ؟ محمد منيب يا سادة كان عضوا في مجلس النقابة واظنه لازال صديقا لنصف اعضاء المجلس بمن فيهم النقيب نفسه؛ ومنتصر الزيات محام كبير وكان منافسا غير مرة علي منصب النقيب. ماذا فعلتم لهم؟ أين نقابة الصحفيين من عبد الحلیم قنديل صحفي وهو رئيس تحرير فاين انتم منه وزملائه؟ طبعا لجنه حقوق الانسان في البرلمان مشغوله بمشروع قانون هيشغلوا بيه المساجين سخره بدل قعدتهم في السجن لا شغله ولا مشغله فمش فاضيه . أين المنظمات الحقوقيه المصريه ؟

نحن لا نريد الرحمه ولا نطلبها فهي للضعفاء والخائفين، ولا نريد العدل ولا نتصوره فالعدل يبذو وكأنه قد هجر بلادنا ؛ ولكننا نطلب الحقوق وسنكافح لنحصل عليها ؛ ووفقا للدستور الذي كتب

بنوايا حسنه فإن كل من يقبض عليه او يتم احتجازه يجب ان يعامل بما يحفظ عليه كرامه الانسان ولا يجوز ايذاؤه ..وطبعا لا يجوز تركه يموت من البرد. <http://bit.do/eFWFH>

20 يناير

### عن محمود نظمي

والد طفلي الدقهلية "هددوني بعائلي وأجبروني على تسجيل الاعتراف" .. محمود نظمي المتهم بقتل طفليه بالدقهلية ردًا على أسئلة القاضي بالمحكمة... <http://bit.do/eF6te>

21 يناير

### منار الطنطاوي

في انتظار الزيارة طفل صغير لا يتعدى عمره 6 سنوات جاب منديل ورق و قلم و كتب عليه بحبك يا جدو.

لقيت واحدة من الموجودين بتقول للام الحقي شوفي ابنك بيعمل ايه؟ و كأنه وقعت جريمة كبيرة .

ايه ده اللي انت عملته؟

ايه عابز اكتب لجدو انه وحشني و انا بحبه.

انت عارف ان كلنا ممكن يحصلنا ايه من اللي انت عملته و



كورت المنديل و رمته و كسرت القلم.

و باقي الناس تأنيب في الولد و انا مذهولة من الحديث و الكلام.

اتضح انه فعلا القلم من المحرمات و لازم يدخل باذن و يكون ليه سبب زي هيتمحن مثلا و بس و ياخده في الامتحان فقط غير كده لا الا بتساهيل ربنا و تحايلات علشان المذاكرة.

طبعا الناس كلها خافت ان لو حاجة زي كده ممكن تلغي الزيارة للكل فعلا.

انا بقى كل اللي فكرت فيه الطفل الصغير اللي معملش جريمة علشان عايز يقول لجدو بحبك هيكمل يومه ازاى و الناس كلها بتلومه على حاجة هو مش مدرك ايه الغلط فيها و هل يا ترى الموقف ده هيسيب علامة فيه سواء من اللي في السجن او الناس اللي تبرعت بلومه و تقريعه.

هل فعلا اهله مفهمينه الوضع و لا الكلام كبير على عمره و ادراكه علشان يستحمل اللي حصل.

المشهد كان ضمن مشاهد كثير مؤلمة بتخليني اكره السجن و الزيارة و كل مرة اقول مش هروح المكان ده و اروحه برجلي تاني مضطرة و مغصوبة على زيارة مش زيارة و انتهاكات لحقوقنا و لحقه علشان ملوش تهمة و تقريبا بنتعاقب علشان اسوياء في بلد رافضة ده. <http://bit.do/eGiWP>

22 يناير

## عبد الرحمن زغلول

من ساعتين في وسط البلد قاعد علي قهوة في شارع منصور منتظر ميعاد الكورس، بتاعي وفجأة بقوات تدخل علي القهوة وملثمين ومباحث،

خديو بطاقتي وبطاقة صديقي وفجأة سابوا كل الناس ومسكوا فيا، مجرد ما عرف أن كنت مسجون سياسي، وخذ موبيلي فتش فيه، وفضلوا يحققوا معايا، رغم أنهم عملوا اتصالات مافيش حاجة عندي ولحسن حظي أن كان معايا ورق المخالصة يثبت أن مخلص كل شيء، وفجأة المعاون يحاول يثبت أن عليا لسه قضية بقدم علطول بالورق أن ملخصها، كان مصمم جدا انه ياخذني بس الحمدلله عدت علي خير،

بتعمل ايه في القاهرة وقاعد فين، والقضايا دي كلها ليه أنت شكل نشاطك كبير، ايه علاقتك ب٦ إبريل، وماسك لجنة ايه في حزب الدستور، وبتاخذ فين الكورس، وتصوير للجواز والبطاقة، ومصمم أنه يعمل اتصالات عشان يحاول يوجد أي شيء ياخذني لأن شاف اربع قضايا دي حاجة كبيرة،

مايكتفيش بكده ينادي علي صاحب القهوة، يقوله الشخص ده مايقعدش عندك تاني لو قعد عندك هقفلك القهوة، وكمان يروح بعيد عني يقول لصاحب القهوة أن الشخص ده تبع (داعش) ماتقعدوش عندك!

رغم أن فضلت أفهم الطلاب المحترم أن بعدت كل البعد عن كل شيء من وقت خروجي، وأن اتبهدت في السجن كثير ومش حمل بهدلة تاني وأن مخلص كل شيء ليه بيحصل ده معايا، وأن بتعالج نفسيا لسه من فترات السجن اللي فاتت

يرد الطلاب التاني يقولي لو شوفتك هنا تاني في الشارع ده (هسفر) هحبسك مش هخليك تشوف الشارع!

وفي النهاية خدت ورقي ومشيت خالص من القهوة ومن الشارع مشيت وأنا مكسور ومهزوم والإكتئاب متملك مني ومنظري قدام الناس، وقتها ونظرات الناس ليا، عيون عاجزة وخايقة بس بتحضن بتطمني، مش عارف كنت فرحان أن ربنا أنقذني ولا أزعل من الإهانة والذل اللي مايبنتهيش

مش عارف أنا العك ده هينتهي امنا رغم أن مخلص كل شيء. ومش عارف ايه كمية الانتقام دي مش مكفيهم كل اللي شوفته، هفضل لحد امتي أحاسب وأدفع التمن، مش قولنا خلصت الحدودته من بدري عدي سنين، في ايه بقي ليه عايزين تقضوا علينا مره واحده كده كده بنموت بالبطي والله من آثار تعذيبكم في السجن والحرب النفسية اللي بتمارس ضدنا من سنوات هنموت والله ماتخفوش ..

مش هنزل أمشي في الشارع ولا هروح قهاوي ولا هسافر في أي مكان هحبس نفسي في البيت لحد ما أموت عشان سيادة الطلاب يرتاح ويحس بروح الانتصار لما يمنعي ويهددني، شكرا أن كل يوم

بتكرهونا في كل حاجة .. <http://bit.do/eGi8Y>

24 يناير

عن اسلام خليل

إسلام قرر يبدأ إضراب كلي عن الطعام من مساء النهاردة ولحد يوم 11 فبراير ليس لأي شئ سوى للتذكير بحبسه تعسفا لأكثر من 320 يوم بعد تعرضه للإختفاء والتعذيب، والمطالبة بحقه في الحرية والعدالة ومحاسبة الجناة الحقيقيين اللي اختفوا وعذبوا ولفقوا .. إسلام إختار يضرب عن الطعام في ذكرى الثورة مستخدم حقه القانوني والانساني والسلمي في التعبير عن رفضه وغضبه لأن دي مش أول مرة الذكرى تيجي وهو في السجن بدون أي جريمة جريمة ولإن مطالبه هي نفس مطالب ثورة يناير



إسلام بببدأ الإضراب النهاردة مع معتقلين آخرين وهم (جلال البحيري، شادي الغزالي حرب، أحمد صبري أبو علم، عبد الفتاح البنا).. ندعوكم للتدوين عنهم والمطالبة بحريتهم ولغيرهم من المعتقلين من النهاردة وعلى مدار ال18 يوم. <http://bit.do/eGKS9>

25 يناير

فاتن خاطر

من حوالى ساعة هجمت علينا الداخلية ..وبهدلونا اخر بهدلة ..كنا نايمين ..ولم يراعوا حتى مرض أمى وحالتها الخطيرة..تقريبا جاين بتوصية محترمة.. خدوا التليفونات ..وجهاز الكمبيوتر ..واللاب ..وبهدلوا البيت . وخدوا اخويا تامر ونزلوا.. تامر خاطر ..رجاءا حد يساعدنا.. ولو ممكن حد من الحقوقيين ..ولوفي صحفى يرصد البهدلة ال حصلت ف بيتنا .. <http://bit.do/eGKWe>

27 يناير

عن هشام جعفر

فقرة من مقالة اليوم السابع بمناسبة العفو الرئاسي بمناسبة عيد الشرطة.

"يأتى ذلك فى إطار حرص وزارة الداخلية على إعلاء قيم حقوق الإنسان وتطبيق السياسة العقابية بمنهجها الحديث وتوفير أوجه الرعاية المختلفة للنزلاء، خاصةً فى مجال التواصل الاجتماعى مع أسرهم."

طيب يا وزارة الداخلية انا كمان ليا حق فى التواصل الاجتماعى وزيارة زوجى الى مشوفتوش من سنة و شهر.



طبيب لو توفير الرعاية الصحية انا كل سنة بقديم طلب ان #هشام\_جعفر يعمل العملية بتاعته و انتوا مش بتنفذوا و لا بتهتموا بكل الطلبات اللى بنقدمها لمصلحة السجون و اخرها طلب برقم 14/8 بتاريخ 9 يناير 2019 و الطلب مقدهما انه يتم اجراء عملية ليتحول في وصل الاستلام لعلاج. زى ما بتدوروا على حق المسجون الجنائ احنا كمان لينا حقوق كمسجون سياسي.

كل ده و لم اتحدث عن حقه في الافراج لانه لم يوجه له اى ادلة اتهام و لم يحول لمحاكمة رغم مرور سنتين الحبس الاحتياطي اللى القانون وضعهما بايدىكم انتم.

هشام جعفر داخل في اربع سنين حبس احتياطي لاسباب لا نعلمها و بنخمنها طول الفترة اللى فاتت. لا ادري لماذا كل هذا الانتقام من شخص تم وصفه بانه شيخ الاصلاحيين و رجل حوار و نبذ عنف.

<http://bit.do/eG2vf>

28 يناير

**بيان من أسرة دكتور محمد علي بشر**

الإثنين ٢٨ يناير ٢٠١٩

تستنكر أسرة الدكتور محمد علي بشر، وزير التنمية المحلية السابق، منع الزيارة عنه لمدة عام كامل منذ مطلع العام الماضي وحتى الآن. وقد وصلت أنباء تقييد بنقله لمستشفى السجن للعلاج، وقد استطاع المحامون استصدار تصريح لزيارة أسرته له بالمستشفى. إلا أنه بعد قبول التصريح وانتظار الأسرة في ساحة الانتظار بمستشفى السجن، تم إبلاغهم بأنه ممنوع من الزيارة ورفضوا الإفصاح عن حالته الصحية.



وبناء عليه، تحمل الأسرة إدارة السجن والمستشفى والسلطات المختصة كامل المسؤولية القانونية والأخلاقية عن صحته. وتدين حرمانه من حقه القانوني والدستوري والإنساني في الزيارة لمدة عام كامل وانقطاع أخباره عن ذويه.

كما تؤكد الأسرة أنه لم يتم تنفيذ قرار محكمة جنايات القاهرة بالإفراج عن دكتور محمد علي بشر حتى الآن، وهو القرار الصادر في نوفمبر عام ٢٠١٧. ويعد استمرار حبسه مخالفة قانونية ودستورية صريحة، إذ أنه يخالف قرار المحكمة المختصة. ولا يشفع في ذلك تلفيق تهم جزافية له بشأن أحداث جرت وقائعها وهو في الحبس.

وتطالب الأسرة بالإفراج عنه وتمكينه من رؤية ذويه، وحقه وحقهم في الزيارة بشكل عاجل للاطمئنان على وضعه الصحي وتحسين ظروف سجنه السيئة في سجن العقرب التي تؤثر على صحته.

<http://bit.do/eG2ym>

## فاطمه هشام مراد، زوجة شادي الغزالي حرب

اضراب شادي الغزالي عن الطعام بسبب شق قانوني و شق سياسي.. الشق القانوني هو لاعتراضه علي حبسه احتياطيا طول المدة دي بدون اي سبب او تهمة واضحة ،عدم التحقيق معه الا مرة واحدة فقط،حبسه انفراديا بدون اي وجه حق و تجديد حبسه طوال ٢٦٠ يوم..و اما عن الشق السياسي فدي صرخته بمبادئ الثورة اللي غابت تماما عن الساحة..هتافه بالعدل و الحرية من ورا القضبان..إعتراضه علي الظلم و القهر اللي بيتعرض له هو و الاف سجناء الرأي بحجة الحبس الاحتياطي الي أصبح طريقة للتنكيل بكل من كان له رؤية او رأي معارض..ادعموا شادي و كل الي



زيه.. <http://bit.do/eG2yw>

29 يناير

نور خليل

امبارح اتمنعت من الزياره بحجة أن تسجيل الزياره اتقفل، النهارده سمح ليا بزيارة إسلام في محبسه في سجن طرة تحقيق، إسلام برغم تأثير الإضراب على صحته إلا إن معنوياته مرتفعه لدرجة عاليه مشوفتهاش في عينه قبل كده من بداية ما اتسجن وبيعافر ويقاوم، عرفت من إسلام الاتي:



\_اسلام خليل، وشادي الغزالي حرب، وجلال البحيري، وأحمد صبري أبو علم، وعبد الفتاح البنا مازالوا مستمرين في إضرابهم عن

الطعام.

\_هناك معتقلين آخرين انضموا للإضراب في خلال الأيام السابقه سوف تعلن أسرهم ومحاميهم إضرابهم

\_إدارة السجن وعلى رأسهم محمد عبد العظيم رئيس مباحث السجن بيحاولوا بكل الطرق إثناء المضربين عن إضرابهم، مرة بالتهديد ومرة بالسياسة والمناقشة والوعود.

\_زيارة امبارح اتلغت لان وقت الزياره كان اسلام في مكتب رئيس المباحث بيتم التحقيق معاه بخصوص الإضراب من رئيس المباحث. وأشخاص آخرين مش من إداره السجن

-إدارة السجن رفضت عمل محاضر لإثبات الإضراب حتى الان برغم طلب المضربين اكثر من مرة من الأمور ورئيس المباحث عمل المحاضر.

\_امبارح اسلام وجلال تعبوا ولما راحوا لدكتور السجن رفض الكشف عليهم وقياس الضغط والسكر وقالهم انا مش هتدخل الا لما تبقوا بتموتوا او متوا، إسلام إتكم معاه كثير عن قسم المهنة وعن دوره كطبيب مش سجلن، في نهاية اليوم تم الكشف عليهم.

\_برغم ابلاغنا للمجلس القومي لحقوق الإنسان بالوضع الا ان حتى الان مفيش اي تحرك حتى الان مع الداخلية او إدارة السجن.

حتى الان مفيش اي إجراءات خدتها إدارة السجن ضد المضربين اكثر من التهديد و احيانا يعرضوا على المضربين تحسين ظروف الاحتجاز مقابل إلغاء الإضراب وعدم إثباته في محاضر رسمية، وده دليل على قوة المضربين والمتضامنين معاهم ومدى خوف إدارة السجن والأمن الوطني من استمرار الإضراب وانضمام اعداد اكبر من المعتقلين

النهارده اسلام محبوس من ٣٣٠ يوم، ومضرب لليوم الخامس اعتراضا على حبسه تعسفي للمرة الثانية والمطالبة بالعدالة له ولكل المعتقلين والمختفين في مصر تزامنا مع ذكرى ثورة يناير مع معتقلين آخرين في قضايا مختلفة جميعهم محبوسين تعسفا بدون أدلة او محاكمة

دعمكم مهم في رفع الظلم عنهم وفي حمايتهم من حدوث اي انتهاكات ضدهم، صوتكم مهم بيظمنهم وبيوصل ليهم وبيعرفوه من تغير المعامله

#الحرية\_لاسلام\_خليل

<http://bit.do/eHhCh>

### ١. نجاد البرعي المحامي

بحثنا عن المهندس يحيى حسين عبد الهادي في كل مكان قسم اول مدينه نصر وقسم ثاني مدينه نصر وذهبنا الي نيابه امن الدوله لا وجود له ...ما يهمني الان ان الرجل مريض وانه يتناول ادويه بشكل منتظم ومحدد المده ويجب ان نعرف اين هو علي الاقل كي يستطيع تناول دواؤه.

<http://bit.do/eHhCD>

2 فبراير

### ١. خالد المصري المحامي

طلبت من المحكمة اليوم في قضية أنصار استخراج أخونا المهندس / خالد حربي من القفص للحديث للمحكمة عن سبب وتداعيات إضرابه عن الطعام منذ أيام فرفضت المحكمة خروجه ثم طلبت منها دخولي القفص الزجاجي لزيارته والاطمئنان عليه فوافقت المحكمة وانتظرت إذن حرس القاعة لتنفيذ قرار المحكمة ولكنهم رفضوا حتي مجرد دخولي والاطمئنان عليه ،،،،

سوف تظل تداعيات الإخفاء القسري لثلاثة أطفال أبناء عمر رفاعي سرور مشكلة كبيرة في ظل انباء شبه مؤكدة عن إيداعهم أحد دور الأيتام مع رفض السلطات تسليمهم لذويهم في ظل حالة غموض شديد عن موقف أمهم مريم محمود رضوان ، ان شاء الله سوف نتقدم غدا بالبلاغ الثاني للنائب العام بعد عدم الرد علي البلاغ الاول لالزام الداخلية الإفصاح عن مكان احتجازهم ،،،

<http://bit.do/eHHGx>

## زوجة شادي الغزالي حرب تروي تفاصيل حالته الصحية والتضييق على الزيارة



Fatma Hisham Mourad

11 mins · 🌐

لسة راجعة من زيارة شادي..شادي بقي لونه أصفر..و خس و تعبان..لكنه متماسك الحمدلله لكن مش قادرة غير اني اسئل ايه كل الظلم و الالم ده؟؟ المفروض نستحمل ايه و لا ايه؟؟ و شادي مصيره ايه؟؟ و للأسف وقت الزيارة تقلص للنص و المراقبة زادت فالزيارة..و انفعلت هناك للأسف و الواحد بقي يتصرف بطرق مش عاجباه و يتحط في مواقف مش قادر يستحملها و الظلم و القهر فاق الاحتمال..حسبنا الله و نعم الوكيل..حسبنا الله ونعم الوكيل

<http://bit.do/eHHEu>

### منى سيف عن زيارة شقيقها علاء سيف

النهاردة كان يوم عجيب ومرهق جدا

رحنا زي المعتاد الزيارة لعلاء في طرة والنهاردة الزيارة كانت بتصريح نيابة. للى مش عارف النظام فعلاء لأنه بيقيضي حكم من حقه زيارة عادية من السجن كل ١٥ يوم، بالاضافة لزيارة كل شهر بتصريح من النيابة.

وصلنا ١٠ ونص على بوابة سجن عنبر الزراعة سلمنا بطايقنا وتصريح النيابة وانتظرنا ينادونا. لكن لأول مرة واحنا بقالنا سنين بنزور في السجن ده اتقالنا "فيه تعليمات جديدة من أمن الدولة ودلوقتي لازم نبعثهم بزيارتكم وننتظر الرد"

حاولنا نفهم سبب التعليمات الجديدة

قلنا كل الكلام البديهي: احنا أسرته المباشرة، بنزوره بقالنا اكثر من ٤ سنين في نفس السجن ده وعمر ما حصل كدة، معانا تصريح نيابة بالزيارة، بالاضافة لأهم نقطة: علاء فاضله اقل من ٦ أسابيع ويخلص مدته فليه دلوقتي؟؟

والاجابة كانت هي هي " مش بايدنا، تعليمات جديدة، في انتظار توجيهات أمن الدولة "

وعلى مدار ساعات الاجابة كانت "لسة منتظرين التوجيهات"

انتظرنا قدام بوابة السجن -مع ملاحظة ان معانا خالد ابن علاء- من الساعة ٣٠:١٠ ص ل ٣٠:٤٠م. لحد ما وقتها قالولنا لازم يقفلوا السجن وتوجيهات أمن الدولة لسة ماجاتش ورجعولنا البطايق والتصريح، واعتذروا عن انهم حتى ياخدوا الأكل ويدخلوه. فواضح ان تعليمات أمن الدولة الجديدة هي ابعثولنا عشان ما نردش!

فلو فيه ظابط أمن دولة بيتابعنا يا جماعة يقول لرئيسه علاء فاضله ٤٠ يوم ويخلص ٥ سنين سجن بالتمام والكمال، فايه لازمة الافتكاسات دلوقتي؟ هتيجوا في اخر اسابيع في مدته تشوفوا اذا كان اهله من حقهم يزوروه ولا لأ؟! !!

مش هاقول حبة التزام بقوانين، ولا هاقول حبة رحمة، بس حبة منطق! حبة منطق صغيرين مش هيخسروكم أي حاجة.

عامة ادينا هنحاول تاني وهيبان ده النظام الجديد وده مؤشر لأي استهبالات تانية ولا كانت لحظة عابرة قرر فيها ظابط أمن الدولة المسؤول انه يخلينا نقضي day use في طرة

فاضل ٤٠ يوم وتنتهي علاقتنا بطرة ونبدأ فصل جديد من الرحلة ومن علاقتنا مع الداخلية وأمن الدولة اللي مش راضية تنتهي: ٥ سنين مراقبة لعلاء <http://bit.do/eHHQr>

6 فبراير

### ١. دعاء مصطفى المحامية

احمد معوض زميلنا المحامي وصل نيابه اول الزقازيق شففته في اخر التحقيق هيئه وصوله كانت حوالين عينه الشمال دايره زرقا وتجمع دموى في العين من لكمه في عينه وجاكت البدله مقطوع من الكتف احمد طلب سواله كمجنى عليه في وقعه الاعتداء عليه وتعذيبه ولم يوافق وكيل النيابة ان يسأل كمجنى عليه وطلب عرضه على مستشفى لعمل تقرير طبي بالاصابات احمد حكي ان أثناء القبض عليه تم ضربه بلكمه نرف دم من مناخيره و لكمه العين حدثت بسبب الاعتداء عليه في القسم بعد التحقيق مع الأمن الوطني وكدمه بالرجل الشمال من أثر الضرب المبرح في القسم انتها التحقيق وفي انتظار القرار (تحديث) القرار ١٥ يوم تم توجيه له تهمة الانضمام لجماعه والترويج لافكارها وحياسة مطبوعات لترويج لاغراضها وفي انتظار القرار. النقابه محضرتش رغم أن محامى النقابه عنده خبر قالوا مش بنحضر مع متهمين سياسى

<http://bit.do/eHHZi>

### نور خليل عن زيارة اسلام خليل

اللي حصل معايا النهاردة أنا وأسرة #أحمد\_دومة وأسرة #حازم\_عبدالعظيم:

-روحت السجن(سجن طرة تحقيق) الصبح الساعة ٧ سجلت الزيارة وقعدت انتظر دوري في الطابور، عدي اسمي ومنتدش وكمل ينادي بقية الأسماء، سألت ليه اسمي مجاش الظابط اللي على البوابه الخارجية قاللي انه ممنوع من الزيارة، ايه السبب؟ منعرفش.

-فضلت منتظر لحد الساعة ١١ تقريبا قدام السجن في محاولة لفهم ايه اللي بيحصل بدون اي رد ومفيش اي حد بيقول معلومة مفيدة، ونفس الموضوع مع زوجة حازم عبد العظيم وأسرة احمد دومة.

-الساعة ١٢ احد افراد المباحث طلع طلب مننا البطايق وقال إن فيه قرار من الأمن الوطني للمحبوسين معينين ميزوروش غير بعد ما ناخذ الموافقة منهم، وخذ البطايق ودخل السجن.

-بعد نص ساعة طلبوا مننا ندخل ننتظر جوا السجن، دخلنا حطونا في قفص حديد وقفلوا الباب بتاعه وفضلنا واقفين في القفص حوالي ٣ ساعات لحدا ما خرج رئيس المباحث يقولنا ان الأمن الوطني رفض الزيارة وأنا ناخذ بعضنا ونمشي، ولما اتكلمنا انهم حتى ياخدوا الاكل والاعاشة قال انه هيستأذن من الأمن الوطني وبعدين رجع قال إنهم رفضوا.

-خلال الأيام اللي فاتت ده حصل مع أسرة ( عبد الفتاح البنا، ويحي القزاز، وعلاء عبد الفتاح)

-الي عرفناه من طرطشة الكلام ان الأمن الوطني طلع قرار بيضم عدد من المعتقلين السياسيين في قضايا رأي ومنع الزيارة العادية ليهم ولازم موافقة الأمن الوطني على الزيارة الأول ( والي مبتجيش زي النهاردة)

-معنديش اي معلومات عن اسلام غير أنه تعبان وبتعرض لضغوط كتيره من إدارة سجن طرة تحقيق وعلى رأسهم محمد عبد العظيم رئيس مباحث السجن اللي بيهدد إسلام بالحبس الانفرادي والاعتداء عليه، كمان ظباط الأمن الوطني بيهدده بتلفيق قضية جديدة له حتى لو خد إخلاء سبيل في القضية المحبوس على ذمتها .

-إسلام مستمر في إضرابه لليوم الثاني عشر برغم كل الضغوط والتهديدات والمنع.

-تم تقديم بلاغ بإضراب إسلام عن الطعام أمام نيابة المعادي لإثبات الحالة ومطالبه النيابة بالتحقيق واتخاذ الإجراءات القانونية برقم ١٤ لسنة ٢٠١٩ عرائض، وحتى الآن النيابة محقتش فيه .

-المجلس القومي لحقوق الإنسان والساده أعضائه على علم باللي بيحصل وبالتطورات لكن حتى الان مفيش اي تدخل إطلاقا من اي نوع اكثر من رد على التليفون ومعلش وهنشوف.

بكرة هنبتي ناخذ إجراءات قانونية ضد إدارة السجن اللي بتنفذ منعنا من الزيارة، وضد محمد عبد العظيم رئيس مباحث السجن اللي بيهدد إسلام وبيضغط عليه واللي يقول للأهالي ( انا جاي هنا عشان اذلكم). وهنبحث في كل الإجراءات القانونية والسبل اللي ممكن يتم اتخاذها، وهنشوف مع الأسر اللي بيتم منعها ايه التحرك الجماعي اللي ممكن نعمله

ولحد ما نضمن على اسلام بنفسنا بنحمل وزارة الداخلية وقطاع السجون بالوزارة وجهاز الأمن الوطني و النيابة العامة ونيابة أمن الدولة مسؤولية السلامة النفسية والجسدية لاسلام

مش احنا اللي بنسيب حقنا ولا احنا اللي بنسيب أصحابنا واخواتنا الجدعان يواجهوا لوحدهم، وإذا كانوا متخيلين انهم كده بيذلونا وبيكدرونا فياريت يفهموا اننا بنشفق عليهم من كم المرض والحقد والشغل اللي جواهم وهيحرقهم في النهاية مش اكثر، وعندنا وعند ذوينا قوة نستحمل اي حاجة مقابل اننا منسيبش حقوقنا

وهقتبس من كلام علاء عبد الفتاح لما قال ( انا في السجن سعيا من السلطة لان تجعل منا عبرة، لنكن عبرة اذا ولكن بارادتنا). <http://bit.do/eHHZ5>

عن حسنولا

تعرف يا حسن؟

لقد جربت ليومين ونصف ألا أنام، اختبرت قدرتي في الجلوس على المقاهي والأرصفة طوال الليل والبقاء بلا طعام دون الشعور بضجيج الأمعاء، تحمل لفحات البرد القارسة وأنا الذي لا أطيق الشتاء في انتظار اللاشيء والمجهول، أن تقف عارب الساعة على روحك لكي تعلن دقائقها الرتيبة المملة، أن تنسال دموعك الساخنة في ليالي الشتاء الباردة والطويلة!

أنتظني يا حسن أنسى أي شيء؟

فرحتك بزهرة؟ حماسك للقائها واللعب معها والتقاط الصور لها؟ وسؤالك الدائم عنها؟ غضبك لأجلي في أي سوء مسني؟ وقوفك خلفي؟ دعمك المطلق في الظلم الواقع علي؟ كنت دائماً أسند لك الأمر (وأنا الذي لا يثق في شيء لم أتمه بنفسه) وأمضي في طريقي واثقاً مطمئناً!

تعرف يا حسن..

يوماً ما فقدنا محمد سوياً ويوماً ما فقدتك أنا لوحدي وكسر ظهري غير أن طبيبي تلك المرة لم يكن هناك!

لأجل عيونك يا حسن تكرم الحياة

2018-2-6

#الحرية\_لحسنولا

#365\_يوم\_حبس\_احتياطي

#زي\_النهاردة\_من\_سنة <http://bit.do/eHH2h>

7 فبراير

منى سيف


صباح الخير

بوست قبل التوجه لطرة لمحاولة زيارة علاء للمرة الثالثة

-يوم الثلاثاء 9:30ص استلمنا تصريح النيابة بالزيارة من دار القضاء العالي ورحنا طرة أنا وماما وخالد ابن علاء عشان نزور ومش متصورين أبدا ان ممكن يبقى فيه أي سخافة خاصة وان علاء في الأسابيع الأخيرة من اتمام الحكم بحبسه 5 سنين .

-قعدنا في طرة منعزلين عن العالم ومنتظرين السماح لنا بالزيارة بعد ابلاغنا بان فيه تعليمات جديدة من أمن الدولة تستوجب اخطارهم بزيارة علاء

وانتظار توجيهاتهم. من الساعة 10:30 ص ل 4:30م في انتظار توجيهات أمن الدولة الي ماجاتش أبدا ورفضوا حتى يدخلوا الأكل .



اضطربنا نمشي لأن السجن كان بيقتل وكان معانا خالد عمره 7 سنوات وكان أصلا كثير عليه جدا التعامل مع انتظار زيارة باباه 6 ساعات واننا نمشي من غير ما يزور .

-يوم الأربعاء الساعة 10:50ص ماما وسناء راحوا سجن طرة مرة ثانية والمرة دي قعدوا منتظرين ساعات برضو معزولين جوة السجن مايبين انتظار توجيهات النيابة ومايبين مفاوضات لحل المشكلة - اللي ماحدث فينا عارف هي ايه أصلا وايه سبب التحايل الجديد على القانون خاصة واننا عرفنا ان فيه أكثر من أسرة معتقل سياسي حصل معاهم نفس الموقف- والساعة 6م أخذوا الأكل يدخلوه لعلاء مع وعد بأن الأسرة لو جت ثاني يوم في مواعيد الزيارة هيسمح لهم بالزيارة خلاص .

فالنهاردة احنا رايعين لتالت مرة بتصريح النيابة نزور علاء وهنفضل لحد ما ينفذوا القانون ويدونا حقنا في زيارته .

أنا بس حابة أؤكد ان احنا على مدار سنين, فهنما والتزامنا بقوانينهم ولو ايجهم يفوق تماما التزام كل ظباطهم بيها. بل بالعكس أكثر من مرة نصطدم بظباط ما يعرفوش اللايحة ولا اهتموا يبصوا عليه وبالتالي مش بيطبقوها .

مرفق صورة تصريح النيابة

الورقة دي مش حاجة هينة, التصريح ده عشان ناخده ماما بتتابع اجراءات كعلى مدار 4 أيام في محكمتين مختلفتين (زيارتين لبداية الاجراءات في محكمة زينهم وزيارتين تانيين لانتهاء الاجراءات واستلام التصريح في دار القضاء العالي ).

والزيارة غير انها حق أساسي لنا وللسجين, لكن هي حقيقي النفس اللي حواليه كل تفاصيل حياتنا وجداولنا بتترتب. ولا مش سهل ولا هين اننا نتحرم من رؤية علاء, وأكد مش سهل اننا كأسرة نفرغ 3 أيام من حياتنا عشان نقولكم يا ظباط أمن الدولة نفذوا القانون !!

ومش سهل ولا هين ان أي أسرة أو سجين يتحرموا من زيارتهم. كفاية انهم متعاملين مع سنين حبس ظلم واجراءات بتهدر العدالة في كل خطوة. #الزيارة\_حق مش ب #أوامر\_أمن\_الدولة

دعواتكم لنا ولكل أهالي المعتقلين اللي اتمنع عنهم الزيارات <http://bit.do/eHViB>

## عن قرارات المنع من الزيارة

القرارات الجديدة بمنع الزيارات بتعليمات من أمن الدولة ما تخصص علاء لوحده. يبدو ان فيه تعميم بقاله يومين بمنع الزيارات في أكثر من سجن على معتقلين سياسيين مختلفين وماحدث فاهم ايه سبب التصعيدة الحالية .



منع الزيارة سياسة أمن الدولة مستخدمينها بقالهم شهور وسنين مع قضايا مختلفة بتنظر قدام نيابة أمن الدولة, على سبيل المثال وليس الحصر هشام جعفر وعلا القرضاوي ممنوع عنهم الزيارة أكثر من سنة, والوضع الكابوسي المستمر بقاله سنوات لمعتقلي العقرب هو منع الزيارات .

في التصعيدة الأخيرة اللي احنا لسة بنحاول نفهم أبعادها, علاء أقل حد في اللي عرفنا أساميهم لحد دلوقتي تضررا من القرار ده, لأن علاء في الأسابيع الأخيرة من انتهاء مدة حبسه كاملة وبعدها ننتقل للكابوس الجديد اللي اسمه المراقبة واللي خاضع تماما لتحكم أمن الدولة والداخلية. لكن بالنسبة للباقيين الزيارة مش بس حق أساسي لكن طوق نجاة .

اللي نعرف عنهم لحد دلوقتي :

-د. عبد الفتاح البنا: اتمنعت الزيارة عنه يوم الاثنين. وهو مضرب عن الطعام من يوم 25 يناير, وصحته ضعيفة, وأهله طالبوا أكثر من مرة بعمل فحوصات والداخلية تجاهلتهم, ودلوقتي منعوهم من الزيارة اللي هي السبيل الأساسي للاطمئنان على صحته .

رابط عن منعي زيارته

<https://www.facebook.com/mohamed.fathi.5245/posts/10218229146419760>

-د. يحيى القزاز اتمنعت عنه الزيارة امبارح. د. يحيى مصاب بأمراض في الكلى، وصحته متدهورة لدرجة ان طبيب السجن أوصى بضرورة عرضه على مستشفى متخصص. لكن إدارة السجن تجاهلت ده لحد ما وصلت حالته لاحتباس كامل للبول في بداية هذا الأسبوع.

وامبارح رفضوا السماح لأسرته بزيارته، وبالتالي قطعوا اخر طريقة للاطمئنان على صحته.

-أحمد دومة: أهله اتمنعوا النهاردة عن زيارته. ولازم نفتكر ان دومة محبوس انفرادي بقاله سنين, ومن شهر اتحكم عليه ب 15 سنة سجن. يعني بشكل عملي تماما زيارة أهله له ضرورية لامداده بالأكل ولوازم المعيشة لأنه في حبس انفرادي, وبشكل معنوي أكيد مفهوم مش بس ليه الزيارة مهمة له, بس السؤال هو هم عايزين ايه؟ عايزينه يقضي حكم 15 سنة محروم من الزيارة؟؟ أو أهله بيتكدروا كل مرة ومش هيعرفوا ينفع يزوروه ولا لأ؟

-اسلام خليل: أخوه اتمنعت من الزيارة النهاردة. اسلام مضرب عن الطعام من يوم 25 يناير. للتذكرة دي مش أول مرة اسلام يتحبس فيها, اسلام سبق واتحبس قبل كدة, وفي المرتين الحبس كان بدايته فترة طويلة من الاخفاء القسري, وفي الحبسة الأولى اتعرض لتعذيب مروع !

-و حازم عبد العظيم برضو اتمنعت أهله من زيارته النهاردة بنفس الطريقة وبدون توضيح أي أسباب غير ان دي تعليمات أمن الدولة الجديدة

رابط بوست نور خليل عن دومة واسلام وحازم عبد العظيم

[https://www.facebook.com/permalink.php?story\\_fbid=806745612998174&id=1000098822730](https://www.facebook.com/permalink.php?story_fbid=806745612998174&id=1000098822730)

86

-سيد مشاغب في حبس انفرادي هو كمان بقاله سنتين في طرة شديد الحراسة 2, وامبارح منعوا عنه الزيارة هو كمان

[https://www.facebook.com/ultraslife2007/photos/a.696523490707270/797214960638122/?ty](https://www.facebook.com/ultraslife2007/photos/a.696523490707270/797214960638122/?type=3&permPage1)  
[pe=3&permPage1](https://www.facebook.com/ultraslife2007/photos/a.696523490707270/797214960638122/?type=3&permPage1)

-محمد أكسجين وسامح سعودي برضو اتمنع عنهم الزيارة من يومين, وبنفس الطريقة ساعات من الانتظار بحجة "لسة الموافقة الأمنية ما جاتش."

[https://www.facebook.com/permalink.php?story\\_fbid=409716829772367&id=2425501331557](https://www.facebook.com/permalink.php?story_fbid=409716829772367&id=242550133155705)  
[05](https://www.facebook.com/permalink.php?story_fbid=409716829772367&id=242550133155705)

ورابط عن منع الزيارة عن علاء

<https://www.facebook.com/laila.souEIF/posts/10156800057410995>

وأكيد هنعرف عن معتقلين تانيين بمرور الوقت.

<http://bit.do/eHVio>

**منى سيف**

الساعة ٤٥:١٠ م قررنا أنا وماما نمشي من قدام سجن طرة .

نظريا فيه وعود بحل أزمة الزيارات يوم السبت. باقول نظريا لأن امبارح اتوعدنا بأننا هنزور النهاردة وزي ما انتو شايفين تجاهلوا وعودهم تماما. المشكلة الأساسية ان اللي بيوصلونا الوعود بتاعة أمن الدولة ظباط في السجن مش هم اصحاب القرار، وعلى مدار ٣ أيام مافيش ظابط من أمن الدولة رضي يظهر ويكلمنا ولا يفهمنا سبب التكديرة دي ولا حتى يقول بشكل واضح ان الزيارة ممنوعة .

بس شهادة حق كل افراد الامن عالبوابة من اصغرهم لأكبرهم عاملونا بمنتهى الذوق.

بقالنا ٣ أيام ادارة السجن منتظرين توجيهات أمن الدولة بخصوص الزيارات وأمن الدولة مش مهتمة تعمل أي حاجة غير انها تتجاهلنا فنتحرم احنا وعشرات من الأسر من زيارة أحببنا.

احنا راجعين يوم السبت، للمرة الرابعة عشان نزور علاء .

ماحدث فينا اختار المعركة دي، ماحدث كان متوقعها. احنا كنا بنعد الأيام على خروج علاء وبنحاول نحضر نفسنا لترتيبات المراقبة. لكن هم مش راضيين يسيبونا في حالنا، ودي معركة مش هينة وما ينفعش نتجاهلها. دي مش خناقة على حاجة داخلية واتمنعت، ده حرمان لأهم حاجة: الزيارة. قطع حبل الوصال ما بينا، يعني متوقعين ان يقولونا مش هتشوفوا علاء، مش هتتعرفوا هو كويس ولا لا، كش هتدخلوله أكل، مش هيعرف اخباركم ويظمن على ماما. دي حاجة مش هينة وما ينفعش نقبلها وده كابوس لأسر كثير غيرنا

الزيارة حق مش رفاهية

يوم السبت هنروح تاني ونحاول نزور علاء وهنفضل نحاول

شكرا لكل حد تابعنا ودعمنا. واسفة اننا كنا معزولين تماما عن اللي بيحصل

<http://bit.do/eHVoa>

8 فبراير

نور خليل

الساعة دلوقي 6 مساء ، منى سيف ودكتورة ليلى سويف في قطاع سجون طرة ( ب ) من الساعة 9 صباحا لمحاولة زيارة علاء عبد الفتاح لليوم الثالث على التوالي ولحد دلوقي لسه مخرجوش وعرفنا من المحامية راجية عمران واللي بتنتظر معهم بأن إدارة السجن بلغتهم إن الأمن الوطني لسه مردش على السماح بالزيارة وإنهم هيقفلوا السجن والأسرة بلغتهم إنهم مش هيمشوا إلا لما يزوروا علاء

على مدار اليومين اللي فاتوا أسرة علاء بتحاول تزوره ويروحوا يقفوا من الصبح لحد آخر اليوم بدون أي جدوى والرد الوحيد تعليمات جديدة من الأمن الوطني بمنع الزيارة إلا بموافقتهم على الرغم من وجود تصريح نيابة معاهم ( تصريح النيابة بيحتاج عشان يطلع 4 ايام شحططة في محكمتين ) ، وده دفع منى ودكتور ليلى النهاردة انهم يروحوا النهاردة ومش هيمشوا من هناك إلا لو شافوا علاء .

إمبارح أنا كمان إدارة سجن طرة تحقيق منعتني من زيارة شقيقي #إسلام\_خليل المحبوس احتياطي بدون محاكمة من مارس 2018 وحتى الآن باتهامات لأساس لها من الصحة ومضرب من 25 يناير، وفضلت إمبارح يوم كامل واقف على رجلي وفي الآخر اتبلغت بان الزيارة ممنوعة بأمر الأمن الوطني، كمان إمبارح أسرة الدكتور حازم عبد العظيم وأسرة أحمد دومة حصل معاهم كده .

يبدو إن فيه قرار من الأمن الوطني بمنع الزيارة عن عدد كبير من النشطاء والسياسيين والصحفيين المعتقلين، الأيام اللي فاتت إتمنع من الزيارة أسرة كل من مع حفظ الألقاب ( يحي القزاز، عبد الفتاح البناء، محمد أكسجين، سيد مشاغب، سامح سعودي) كمان النهاردة عرفنا بمع الزيارة عن ( عبد المنعم أبو الفتوح، محمد القصاص، حمدي الفخراني)

هشام جعفر ومعتز ودنان وهدي عبد المنعم ممنوع عنهم الزيارة منذ عدة أشهر، وهناك الآخرين لا نعلمهم وقضايا كاملة محبوسين احتياطي ويبتجددلهم الحبس وأهلهم مبيشوفوهمش .

اللي بيحصل من توسيع دائرة الممنوعين من الزيارة بالشكل ده بدل السماح للممنوعين بالزيارة مؤشر مخيف شوية.

بعيدا عن التكهنات حول أسباب صدور قرار زي ده : هل هو له علاقة بالتعديلات الدستورية وفيه حد مخبول قالهم إن زيارتنا ممكن تأثر؟ هل له علاقة بقيادة أمنية جديدة؟ ولا سياسة جديدة من الأمن الوطني ؟ ولا محاولة للضغط على المعتقلين وأسرههم كلهم، مش عارف ايه وجه الاستفادة بردو؟؟ ولا مفيش منطق كالعادة وواحد قاعد على مكتب فاضي مش لاقى حاجة يعملها فقال أطلع قرار بمنع الزيارة؟؟.....

بعيدا عن كل ده، أنا خايف على أخويا اللي بتمنع إني أشوفه وأصحابنا اللي أسرههم اتمنعوا كمان، عايزين يعزلوهم عننا أكثر من كده ليه؟ ولا ممكن يكون هيجصل معاهم إيه؟... الشر هو الحاجة الوحيدة اللي بتوقعها منهم

هناخد كل الإجراءات القانونية ضد الهبل والفجر اللي بيحصل، بس محتاجين دعم كل الناس وتضامننا

تحديث بخصوص الممنوعين: إدارة سجن طرة تحقيق تمنع أسرة أستاذ أحمد صبري أبو علم المحامي من الزيارة <http://bit.do/eHVkl>

9 فبراير

الحرية لرائد سلامه

سجن استقبال طرة يمنع اليوم السبت اسرة الدكتور رائد سلامه  
المحبوس احتياطيا علي ذمة القضية ١٣٠٥ لسنة ٢٠١٨ من زيارته  
القانونية الأسبوعية بدون أي أسباب #الحرية\_لرائد\_سلامه

<http://bit.do/eHVGJ>



عن شادي الغزالي حرب

وشادي الغزالي حرب كمان منعوا عنه الزيارة النهاردة. شادي مضرب عن الطعام من 25 يناير  
كدة فيه تعميم على مستوى السجون مش طرة بس بمنع الزيارة عن معتقلين سياسيين لحد ما تيجي  
تعليمات أمن الدولة ولسة بنحاول نفهم كام حد متكدر في الطلعة دي

<http://bit.do/eHVGQ>

عن أحمد دومه

احمد اضراب عن الطعام من النهارده اعتراضا على منع الزيارة.  
النهارده حاولت ازور احمد بعد منع اهله من الزيارة يوم الاربع .. لينا  
زيارتين عاديه واستثنائيه بمناسبة ٢٥ يناير .. حصل نفس السيناريو اللي  
اتكرر في زيارات كل السياسيين، خدوا البطاقه ٩:٤٥ ص دقيقه وقالوا  
انتظر ثم بعد كام ساعه قالوا تاخدي البطاقه ولا تستني لان لسه مفيش  
التعليمات قلت هستني، ساعه كمان وخرج واحد من المسؤولين عن  
قطاع طره وقال عندنا مشاكل في ترتيب الزيارات وحمله تفتيش وترتيبات  
من الوزاره فللاسف مش هينفع زياره وميعرفش ممكن نزور امتي.. سالت  
احمد بكره عنده امتحان فمش هنحاول بكره لكن هنعيد المحاولة يوم الاتنين



احمد بقاله كتير بعيد عن اي معارك بيتلاشي كل الاستفزات، بيحاول يستوعب مصابه.. فليه القرف،

ليه فعلا. <http://bit.do/eHVHZ>

## عن اسلام خليل

أكثر من ٣٣٠ يوم حبس إحتياطي بدون أي جريمة أو محاكمة أو أدلة، ١٥ يوم إضراب عن الطعام، ممنوعين من زيارته القانونية بأمر من الأمن الوطني وأخر مرة قابلناه كان من أكثر من ١٠ أيام وكان وضعه الصحي سيئ جدا... إسلام مازال مستمر في إضرابه وسوف يستمر بعد يوم ١١ فبراير

أنا خايف على إسلام جدا وعلى كل الممنوع عنهم الزيارة، وكل اللي في بالي سيناريوهات سيئة جدا، ليه بيمنعنا عن زيارتهم وليه خايفين إننا نقابلهم؟ ناوطين يعملوا ايه وبيضغطوا عليهم اكثر من كده ازاى وليه؟

تضامنوا معنا للحصول على ابسط حقوقنا

<http://bit.do/eHWfr>

## نور خليل

عبد الفتاح السيسي وكل قيادات الدولة يقولوا ( معندناش معتقلين سياسيين )

تمام يا برنس، هتغاضي عن إن التهمة الرئيسية ( الملققة ) لإسلام هي تهمة سياسية بحتة تتعلق بالتعبير عن الرأي، وهفوت دلوقتي كل الانتهاكات (الموثقة قانونيا) وكل الجرائم اللي ارتكبت في حقهم من أفراد تابعين للأجهزة الأمنية بعضهم معروف هويته وبعضهم مش معروف، وهسكت عن إن السجن بيقسم المحبوسين وزيارتهم ل قسمين ( سياسيين، جنائيين) وده اعتراف ضمني بوجود مساجين سياسيين ومسجل في الكشوف الرسمية للسجون، ومش هتكلم في ضعف



الانتهاكات وعدم وجود أدلة ولا عن الاختفاء القسري والتعذيب وبطلان الإجراءات ولا عن التعنت من النيابة والقضاء، وهعتبر يا سيدي ان اخويا متهم بتهم جنائية بحتة ومحبوس على ذمتها.... ممكن تقولي بقا يا برنس ليه مانعين عنه الزيارة (القانونية كل أسبوع) بأمر الأمن الوطني؟؟ وليه مفيش قرار ادراي حقيقي طلع بده؟. وليه الشخص اللي طلع القرار مستحبي وجبان وخايف يطلع يقول أنا اللي طلعت القرار بناء على كذا وكذا وكذا؟ وليه كل اللي مسؤولين بيحطوا المسؤولية على حد ثاني، للدرجة دي كلكم عارفين إنكم بترتكبوا جريمة ومش عايزين تورطوا بوشوشكم باينه؟ ليه النيابة مبتتحركش برغم إن دي مسؤوليتها؟ وليه المسؤولين الكبار مبیطلعوش بكل قوة وجراءة يكلمونا عن سبب منع الزيارة؟

طب مادام عارفين إن دول معتقلين سياسيين وإنتموا بتنتقموا منهم ومن عائلاتهم وبتتخذوا إجراءات استثنائية وغير قانونية ضدهم ومش هاممكم لا دستور ولا قانون ولا حقوق إنسان ليه مبتطلعوش تقولوا كده بالفم المليان؟ ولا انتوا عارفين ان دي جريمة؟

اللي بيحصل معنا ومع أسر الممنوعين من الزيارة جريمة إنسانية حتى لو حصلت مع اسرى الحرب من جيش الأعداء؟

ياريت حد يفهمهم ان اللي بيحصل ده مش في مصلحة حد وان التصعيد بردو مش في مصلحة حد  
إطلاقا وإن #الزيارة\_حق لكل مسجون أيا كانت جريمته، وان قرار جهة تنفيذية يبطل قرار جهة  
قضائية ده قمة العك والفضيحة

<http://bit.do/eHWik>

### عن معصوم مرزوق

كلنا في انتظار الاوامر...

اليوم السبت ذهبت وابنتي لزيارة زوجي الحبيب وانا همى الشاغل الا  
يراني وانا امشي باعرجاح متكأة على عصا لاول مرة في حياتي وذلك  
لخشونة شديدة بركبتي نظرا للوقوف الطويل.



تلك الزيارة التي لا تتجاوز النصف ساعة على الاكثر اسبوعيا والكنها  
بمثابة عودة الروح لنا حين نملى عيوننا وقلوبنا برؤيته .. والتي علينا  
قضاء النهار بطوله في انتظار دورنا للدخول والتفتيش ثم نعود منهكين  
يقتلنا التعب ولكنه تعب يهون طالما قابلناه وتحدثنا معه حتى ولو لدقائق معدودة.

اليوم صدرت اوامر بعدم السماح بالزيارة .. وبدون ذكر اسباب .. مش لازم نشغل بالنا بذكر اسباب ..  
دول حيا الله مواطنين مصريين .. يادوب قدموا عمرهم كله في خدمة البلد بكل اخلاص..

اليوم زوجة تاجر المخدرات واولاده زارت زوجها .. زوجة الحرامي اللي نهب البلد واولاده زارت زوجها  
.. زوجة القاتل والفاقد واولاده زارت زوجها .. اما زوجات اشرف رجال مصر اللي تهمتهم الحقيقية  
والوحيدة حب مصر اتحرموا من الزيارة لا وايه .. بدون ذكر اسباب . ساعات طويلة قضيناها امام  
البوابة في انتظار الاوامر.

طيب النهاردة في ظروف مثلا .. الظروف دي هتنتهى امتي ؟ مش عارفين .. طيب نيحي نزور تاني امتي  
.. مش عارفين .. طيب الاوامر دي من مين . مش عارفين.

حين تسلبوا انسان حريته وترموه في حبس انفرادى بين جدران اربعة يوم ورا يوم وشهر يلي الشهر  
تكون زيارة اسرته هي النفس الذي يبقيه حيا..

الى صاحب الاوامر .. انتم ادري الناس بطهارة هؤلاء الرجال .. الى صاحب الاوامر

الزيارة حق قانوني .. الى صاحب الاوامر .. قليل من الرحمة والعدل واحترام الشعب .. الى صاحب  
الاوامر البلد دي فيها قانون والاهي فوضى <http://bit.do/eHWiY>

### عن الزيارة في طره

ملخص اليوم في طرة أن أهالي المعتقلين استحملوا الإهانة والبهذلة والقاعدة على الأرض علشان  
يشوفوا ولادهم من ورا الازاز حتى لو مش هيقدررو يلمسوهم علشان ممنوع عنهم الزيارة في السجن

ابسط حقوقهم محرومين منها

بالصدفة شوفت المهندس خالد حربى مش قادر يتكلم بسبب أنه عامل اضراب  
كنت مبسوط أن شوفت عمرو ربيع ومحمد رمضان ومحمد صبرى بعد فترة كبيرة لكن اتوجعت أن  
كنت بدور على حسام مروان فى القفص ونفسى بتقولى مدورش عليه علشان مات فى السجن بسبب  
الإهمال الطبى  
القفص كان فيه حوالى ٣٠٠ معتقل لدرجة أن قولت للقاضى يخلى سبيل اى حد منهم اكيد فيهم ولو  
واحد بس بريئ  
انهارده كان فى ناس محبوسة علشان بسبب اخواتهم مش علشان ليهم علاقة بالسياسة  
معاذ مطر محبوس علشان اخوه معتز مطر  
اخو هشام عبدالله محبوس بس علشان هو اخوه مش اكر  
انس البلتاچى محبوس من ٦ سنين علشان بس أنه ابن محمد البلتاچى.  
كلامى مش مترتب ومالوش معنى زى انهارده بالظبط مزيج من الحزن والضحك والقهر  
فى النهاية ابعدها عن السياسة وابعدها ولادكم عنها علشان متتقهروش علي ولادكم ولا على اهاليكم  
بسببها.. <http://bit.do/eHWiL>

### رسالة من د ليلي سويف

قررنا نحن، أسرة علاء عبد الفتاح، المبيت والاعتصام أمام سجن طرة بعد منعنا من الزيارة لليوم الرابع  
على التوالي، وتجاهل تام لتصريح نيابة رسمى بالزيارة، لانتظارهم توجيهات أمن الدولة منذ أيام!  
<http://bit.do/eHWi3>

10 فبراير

### عن زيارة علاء عبد الفتاح

أول ما ندهوا أسامينا أنا وماما عشان نزور علاء، فكرت ان لازم أما اخرج اشكر كل الظباط اللي اتكدرنا  
معانا الأيام اللي فاتت، واللي اتعاملوا معانا بذوق واللي أوفى بوعده .. بس نكدوا علينا ربنا ينكد عليهم  
ويوجع قلوبهم

-أول حاجة والأهم زرنا علاء واطمنا عليه، وهو كويس وبخير وماكانش فاهم ولا عارف خالص ان  
الزيارة ممنوعة عنه.

-الزيارة تمت فى سجن طرة شديد الحراسة ٢ -رغم ان علاء موجود فى سجن عنبر الزراعة- والزيارة  
كانت فى اوضة صغيرة، بينا وبين علاء زجاج وبنكلمه من خلال سماعة تليفون .  
ماعرفتش احضن اخويا ولا امسك ايده. والزيارة كلها تمت فى حضور بني ادمين معانا فى الناحية بتاعتنا  
من الأوضة وناس تانية معاه من الناحية الثانية .

٥ سنين الا أيام معدودة وجايين دلوقتى يخلوا الزيارة بالشكل ده!!

-اكتشفنا ان الاكل واللبس اللي أخذوه مننا يوم الأربعاء بوعد انه هيدخل لعلاء ما دخلوش وماعرفش عنه أي حاجة. يعني كذبة تانية تضاف لسلسة من الكذب والتحايل بنتعامل معاه بقالنا أيام. لما أصرينا نسأل عالجات دي وهي راحت فين، في الاخر قالولنا انها هتدخله النهاردة مع الحاجات اللي جيبينها.

لكن تاني ما عنديش أي ثقة انهم هينفذوا الكلام ده

-نظريا علاء المفروض لسة زي ماهو في سجن عنبر الزراعة، لكن الزيارات بس هي اللي هتبقى في شديد الحراسة ٢. باقول نظريا لأن تاني ما فيش أي ضمان ان هم بيقولوا أي حاجة حقيقية، وبالتالي يظل احتمال وارد ان جزء من التكديرة اللي مالهاش اي معنى ولا لازمة دي انهم يبقوا نقلوه شديد الحراسة ٢، ولو ده حصل ما فيش طريقة نتأكد ولا نطمئن.

اخر حاجة واهم حاجة: شكرا يا وزارة الداخلية، شكرا يا أمن الدولة، النهاردة علاء اللي شوفته أقرب حاجة لأخويا اللي انا اعرفه ووحشني من كثير. كان هادي، كان مهتم اكثر يطمنا ويطن علينا، كان مصر يتأكد اننا مش هنبهدل نفسنا الفترة دي. النهاردة أنا شوفت علاء أخويا الكبير حبيبي وما تتخيلوش قد ايه دي من أحن الحاجات اللي حصلت من كثير رغم قسوة وحقارة كل التفاصيل المحيطة بال لحظة.

فاضل ٣٦ يوم يا علاء <http://bit.do/eH7kN>

عن محمد ابراهيم صادق

استغاثة زوجة معتقل

انا بس هعرفكو حالة زوجي الصحيه واسمه محمد ابراهيم صادق  
علشان اللي بيسأل هو عنده ايه هو عنده كسر في ركبته اليسرى ومركب  
مسمار نخاعي من حوالي خمس سنين قبل ما يعتقل بسبع شهور وكان  
بيمشي على عكاز ولما اعتقل واتعزب في سجن العازولي طبعاً ساءت اكر  
ومب يعرفش يدوس عليها مؤخرًا حتى لا يطيل عليكم عمل اشاعه عليها  
وطلع المسمار مكسور وطبيب السجن قاله مفروض ميحركش رجله



خالص لان الحركة فيها ضرر كبيره وممكن لقدر الله تؤدي إلى البتر نسأل الله العافيه وهو الآن  
ما علمناه من رسائل الاخوه عن طريق الجلسات أنه يتألم جدا ولا يستطيع الحركة وطلب مننا نبعثله  
كرسي وعكاز ونطالب السجن لنعمله عمليه ونركب له مسمار بدل اللي اتكسر على نفقتنا الشخصيه  
ولكن لاحياه لمن تنادى رفضت إدارة السجن ان تعطينا الاشعه ورفضت تدخل الكرسي والعكاز وحتى  
رجعت معظم الأدوية اللي هي مسكنات معذره مكنتش حبه اشكى همى لغير ربنا ولكن لعل أحدا منكم  
أقرب إلى الله مني يدعيه يعمل العمليه او ربنا يخفف ألمه وحسبنا الله ونعم الوكيل وجزاكم الله خير

<http://bit.do/eH7Hb>

## عن هشام جعفر

## نبتدى الحكاية

بقالى شهر بلف علشان علاج #هشام\_جعفر بعد تعرضه للموت بالاهمال الطبي و تركه اكثر من ثلاث ساعات يعانى من احتباس البول فى نوفمبر 2018 كتبت بوست لمجلس اعضاء النقابة و الكل فاكراه. نتوجهت بعدها بطلب للمجلس القومى لحقوق الانسان اننا كاسرته على استعداد لدفع كل تكاليف

اجراء الجراحة على حسابنا فى المستشفى الى تحدهه الداخلية و انى مش هطلب زيارته فى المستشفى و لا ههوب ناحيتها خالص غير انى اروح ادفع التكاليف فقط والمجلس اتواصل مع الداخلية و الداخلية ردت على المجلس انى اجيب موافقة المستشفى الى انا عايزاه يعمل العملية فيها برغم انه طلب غريب لي الا انى سعيت انا و اقارب و اصدقاء للحصول على موافقة ورقية و فشلنا. و هنا دور النقابة ظهر فى تواصل ا Mahmoud Kamel معايا و قالى انا معاكى و الصراحة من ساعتها و هو بيساعد معمليش انقولوا زى البعض .

ا محمود ساعدنى ان النقابة ترسل 3 خطابات صورهم تحت.

انا كمان قدمت طلب لمصلحة السجون لاجراء الجراحة بتاريخ 9 يناير 2019 و تم تدخل و ساطات واصلة لاعلى مستوى و اتقال ان هشام خلاص بيعمل تحاليل استعداد لاجراء الجراحة و التزمت الصمت و فصلنا نتابع الى ان جاءت تأكيدات ان هشام هيعمل العملية يوم 23 يناير و انى مسموح لى زيارته رسميا مكنتش مصدقة نفسي بس ثقل الوساطة و تأكيدات خلتنى اقول يمكن. و طلبت انى ارافقه اول يومين العملية فقط لو تمت الموافقة و المذهل ان الجهة المسؤلة عن التصريح ده وافقت حسب ما وصلنى من الوساطة الى تدخلت. طبعا من النجمة قمت و انا كللى امل ان الموضوع يتم على خير و هو يتخلص من الامه و اوجاعه. قعدت ارتب هقوله ايه ؟ يا ترى ايه الاحداث المهمة فى حياتنا الى كان لازم يعرفها و معرفهاش. قعدت احلم مع نفسي كتير و طول الطريق اخيرا ممكن اشوفه بعد سنة و شهرين. اخيرا همسك ايده و اطبطب عليه بعد 3 سنين ممنوعة فيهم حتى من السلام عليه ايام ما كنت بزوره. اخيرا هقوله ان النهاردة 30 سنة فى جوازنا و مش هتاخذ افراج منى يا هشام. فرحه و شوق وصل لاعلى مستوى ممكن تخيلوله.

نروح المستشفى نلاقى كل الكلام سراب. هشام مدخلش المستشفى من زمان و اسمه مش فى كشوف العمليات و لا الكشف و لا له ذكر انه راح مستشفى اصلا.

نزلت من قمة الفرحة الغضب و الحزن ليه كده.



الى الى بتستفادوه من الحوارات دى كلها قولوا مفيش عملية زى ما كنتم بتقولوا قبل كده فى الرد على طلباتى. لغاية دلوقتى الطلب لم يتم الرد عليه من مصلحة السجون.

النقابة حصلت على موافقة مستشفى المنيل الجامعى ان هشام يعمل العملية هناك.

وانا لغاية دلوقتى بلف فى طلبات ملهاش اى لازمة لانهم رافضين بعملوله العملية بس بتبع كل السبل القانونية الى مفروض تتعمل علشان حجتهم البايخة الى هما عارفين انها بايخة و ماسخة و ان رغبة شخص معين فى الانتقام من هشام لسبب لا هو و لا احنا نعرفه فبيدوخنا كده.

هشام كانت جلسته يوم 9 فبراير و لغاية دلوقتى منعرفش القرار زى مرات كثير مش جديدة.

هنكمل كل الى بنسعى فيه و هنهار و احزن و ارجع اقوم تانى بعون الله لغاية لما اموت او هو يخرج.

تضامنوا بقى مع مخرجين و بنات عملوا حاجات مشينة و حولوا الساحة لجدار حوالبيهم و انسوا

مظالم كثير جوه السجون بيموتوا حرفيا و لسه بيعافروا. <http://bit.do/eH7oD>

11 فبراير

### عن زيارة شادي الغزالي

انا راجعة تعبانة جدا من الزيارة و افكار كثير ملخبطة فى دماغي معلى استحملوني.. اليوم كان متعب جدا لكن فى اوله كان عندي امل قوي انى ازور عشان النهاردة كنت جايبة اكل مخصوص لشادي عشان يكسر الاضراب. شادي بقاله ١٨ يوم علي مائة بس.. مش عارفة ازاي و لا قدرة اتخيل و لا عارفة اشركلوا تاثير ده علينا كان ايه.. المهم الامل بدا يقل مع مرور الوقت و دخول كل الزيارة الا انا.. روحت و قفت اودام باب السجن عشان يشوفوني يمكن ادخل.. بدات دموعي تنزل غصب عني من الرعب انى فعلا مشوفش شادي و مطمئنتش عليه و ميكسرتش الاضراب.. الامين علي الباب بقى مكسوف منى و هو عمال يفتح الباب و يقفلوا فى وشي و الناس و هي طالعة بقوا مخضوضين انى مدخلتتش و كل واحد يبواسيني بكلمة تخلي دموعي تنزل اكثر و تصعب عليه نفسي اكثر و احس بقله الحيلة اكثر و اكثر.. ازاي وصلنا لكده.. ازاي فى حاجز بيني و بين جوزي و معرفش حتى اشوفه و اطمن عليه و هو زمانه خسر نص وزنه و الله اعلم حالته ايه.. طب هشوفه تانى امي؟؟ طب هيستحمل الانفرادي ازاي و الزيارة الحاجة الوحيدة اللي بتهون عليه؟؟ الف سؤال و عجز رهيب و دموع كثير.. انتظار مر لحد الساعة خمسة بدون اكل او شرب و تعب و برد جامد.. لحد ما بعد كل ده قالولي لا.. مس هيمنفع فيه لجنة تفتيش.. بقيت مش عارفة اعمل ايه.. و لا قدرة ارد.. حاولت افكر بكل الضعف و التعب اللي انا فيه.. قلت طب ادخل الاكل و امنهم رسالة يقولوا له يوقف الاضراب عشان انا كمان اوقف و اروح اكل.. المهم الحمد لله دخلوا الاكل بعد ما قلت انى مش هروح غير لما الاكل يدخل و دعواتي يكون شرب الشوربة او العصير بعد نا فعد ١٨ يوم بيشر مائة بس.. اما هشوفه امي و ازاي و ايه اللي هيحصلنا فالحمد لله من التعب لسة متبنجة و مش قدرة افكر..

<http://bit.do/eH7Pi>

## إبنة ا. هدى عبد المنعم المحامية

من بعد اذان الفجر واحنا في الطريق لزيارة امي بعد مرور ١٠٣ يوم من غيرها ولما وصلنا الساعة ٧ الصبح خدوا بطايقنا وفضلوا سايبنا لحد الساعة ٥ ورفضوا تماما نزورها او نشوفها ونظمن عليها ولم يراعوا سن والدي ولا ان هند اختي حامل وفي التاسع وهتولد في اي ثانية احنا وصلنا لقمة قهر النهاردة بشعة بينا وبينها سور وييتحكم فينا انسان زينا زيه اللهم انتقم اللهم انتقم اللهم انتقم القهر يارب نشكو اليك ضعف قوتنا وقلة حيلتنا وهواننا على الناس انت رب المستضعفين وانت ربنا

<http://bit.do/eH7PB>

16 فبراير

## شقيقة شادي أبو زيد

الحمد لله انا وماما شوفنا شادي النهاردة والزيارة دخلتله، بس شوفناه في سجن شديد الحراسة ورا ازاز وبنسمع أصوات بعض بالتليفون، شوفناه بعد أكثر من ٩ ساعات واقفين قدام بوابة طرة، مش قادرين نشرب عشان منحتجشي الحمام، ومكلناش عشان متعودين نطعم مع شادي يوم الزيارة، خايفين نقوم من قدام الباب عشان لو طلوعوا أي وقت نادوا علينا، مش عاوزه كل شوية اتكلم عن أمي بس كثير كده على أم في السن ده ومريضة عندها أدوية لازم تاخذها تتبهدل كده عشان تشوف ابنها وفي الاخر كمان متحضنوش ولا نططب على بعض، الزيارة دي ملمسناش بعض ولا عرفنا نسمع صوته كويس، دي تالت زيارة بعد وفاة بابا احنا فعلا محتاجين بعض قوي دلوقتي اكثر من أي وقت، شادي مش مجرم عشان يتعامل المعاملة دي وتبهدلوا أهله معاه، وبأكد تاني انه مش مصنف سياسي بأي شكل من الأشكال، ليه واخدينه عندكم وحرمتوا باباه منه في اخر أيامه ودلوقتي بتحرموه مننا، ماما تعبت قوي النهاردة وتعبها بيزيد، بعد كده معرفشي هتقدر تيجي معايا لشادي ولا لا، بتوسل إليكم ترحمونا ارجوكم

<https://goo.gl/PiTEzu>

## عن زيارة اسلام خليل

يوم طويل وصعب بكل تفصيلية وكل مشهد لمدة ١٢ ساعة شحططة ووقوف في الشمس انتهى بإني أشوف إسلام من ورا ازاز وبتليفون وسط حراسة مشددة لمدة ١٠ دقائق في سجن تاني غير اللي هو محبوس فيه، وده بعد منع من الزيارة من يوم ٦ فبراير بشكل غير قانوني

-وصلت السجن الساعة ٧ الصبح سجلت الزيارة وانتظرت وزي ما حصل المرة اللي فاتت خرج حد من المباحث قاللي ان زيارة إسلام منتظرين التعليمات من الأمن الوطني وطلب إثبات الشخصية اديتهوله بعد ساعة رجع اداهولي وقاللي منتظرين التعليمات.

-الساعة عدت ١٢ وزيارة السياسيين خلصت وانا لسه برا في انتظار التعليمات مع أسرة شادي أبو زيد ورائد سلامة.... ساعات بتعدي وكلنا واقفين منتظرين حد يقول اي حاجة، سيدات سنهم كبير يتعذبوا

بالشكل ده ليه؟ ايه المنطق من الموضوع؟ هاتلنا طايب ظابط الأمن الوطني نكلمه، لحد إدارة السجن محدش يعرف ايه اللي هيحصل، طب مين اللي له القرار ونكلمه ازاى؟ مفيش رد.

-الساعة ٣ ونص عصرا خرج احد افراد المباحث خد إثبات الشخصية ودخل وبعد شوية طلع قالنا هاتوا الزيارات هندخلها، وبعد ما دخلنا الزيارات في سجن طرة تحقيق في منطقة سجون (أ) اللي على الكورنيش قالوا هنسيب الحاجات هنا ونروح سجن شديد الحراسة (٢) في منطقة (ب) اللي على الاتوستراد، وهم هينقلوا إسلام هناك نتقابل وبعدين هيرجعوه تاني، ليه؟ منعرفش دي التعليمات وبس» حقيقة مكنش فيه حد في إدارة السجن عارف اي حاجة لا الأمور ولا رئيس المباحث ولا اي حد « كله مستني التعليمات .

-إدارة السجن وأفراد المباحث كانوا لطاف في التعامل وبينفذوا التعليمات بدون اي ترخيم علينا .

\_الساعة ٤ كنت بفتش الزيارة في سجن طرة تحقيق، وسط متابعة من قيادات السجن بشكل دقيق لكل اللي انا جايه في الزيارة، رئيس المباحث سألني ليه مش جايب اكل فقولتله ان اسلام مضرب عن الطعام وكمان دخول الزيارة مكنش مضمون، فقاللي ان اسلام فك الإضراب و ادي أوامر انهم يطلعوني اشترى اكل من اي مطعم قريب له، رocht اشترى اكل و سلمته وبعدين رocht سجن شديد الحراسة ( ٢ ) عشان أزور إسلام.

-وصلت عند البوابة الرئيسية مع أسرة شادي ودكتور رائد وقابلنا هناك أبناء الدكتور يحيى القزاز، كان فيه حد منتظرا على البوابة وعارفين اننا جايين استلم مننا اثباتات الشخصية، ودخل وبعد كده فتحوا باب اتفتشنا ذاتي وسلمنا موبايلاتنا ودخلنا قعدنا في مكتب لمدة ساعة الاربع تقريبا وبعد كده جه شخص لابس مدني ومسلح قالنا هتحرك للزيارة، ركبنا طفطف ودانا لحد سجن شديد الحراسة، وبعدين انتظرنا نص ساعه.

-خلال النص ساعه كان بيوصل عربيات متفيمه راكب فيها أشخاص يبدو انهم مهم او قيادات في الداخلية، وبعد كده بدأت توصل العربيات اللي بتنقلهم، كل واحد في عربيه لوحده ومعاه حراسة وبيدخلوهم.

-الساعة ٥ وربع نادوا لأسرة شادي ودكتور رائد وبعد ما خرجوا نادوا عليا لزيارة إسلام وأسرة دكتور يحيى.

-دخلت بوابة السجن، المباني جوا في مستوى منخفض عن اللي برا، فبينزل سلم وبعد السلم ممر فيه ما يقارب ١٠ أشخاص، واحد منهم كان معاه كشف فيه الأسماء اتأكد أن احنا اللي جايين نزور وبعد كده اتحرك معنا ٣ أشخاص دخلونا ساحة صغيرة فيها مبنى اشبه بالحمامات العمومية الطويلة، كذا كبينه جنب بعض وحوالين المكان حراسة حراسة كثير لابسين مدني وميري، ٣ منهم خدوني للكابينه اللي هدخلها، لقيت إسلام ورا الازاز بيشاورلي وبيبتسم..

مشاعر حزن وغضب مهولة مختلطة بمشاعر حب وحنين وفرحة برؤياه، من اني مش قادر المسه ولا احضنه وبيننا ازاز، لازم افكر في كل الكلام اللي بقوله وهو كمان عشان عارفين ان ده متسجل وحد قاعد بيسمعه واحنا بنتكلم، حاجات كثير تخص حياتنا الشخصية عايز احكيها له وحاجات عايز اخذ رأيه فيها، عايز اقول كلام كثير وكل ملغبط مع ضغط الوقت وكم القلق اللي معمول، اتكلمنا على قد ما قدرنا اننا نظمن على بعض اطمنه على بابا ونفرفش ونضحك ونهلَس، كل ده في ١٠ دقائق تقريبا !!!!

-الوضع العام لاسلام، متماسك جدا وبيضحك ويهزر ويتريق على اللي هم بيعملوه، حالته الصحية سيئة جدا وجسمه بقا ضعيف جدا وباين عليه انه وزنه نقص كثير، كان مستمر في الإضراب لحد النهارده لكنه فكاه واكل قبل ما يخرج للزيارة، قاللي انه مش فاهم لسه ايه اللي بيحصل وليه، وأنه محبوس في زنزانه انفرادي من ٣ أيام لكن رئيس المباحث بالله انه هيرجع للزنزانه اللي كان فيها بعد الزيارة، قاللي انهم ضغطوا عليه جدا عشان يفك الإضراب اتفاجئوا لما عرفوا انه مكمل فيه بعد يوم ١١ لحين السماح بالزيارة، بيسلم على كل الناس، ومحبة كبيرة للي تضامنوا باضرابهم عن الطعام وقد ايه فرق ده معاه جدا

\_مندوب من نيابه المعادي حقق مع إشلام في واقعه إضرابه عن الطعام واخبرهم بشكل واضح ان الإضراب هو حق كفله الدستور والقانون وأنه بيستخدمه كوسيلة سلمية وحيدة في ايده عشان يعترض على حبسه إحتياطي بدون اس سبب قانوني وبدون أدلة وباتهامات باطلة، وانه بيطالب بمقابل رئيس نيابة أمن الدولة اللي بتقوم بتجديد حبسه إحتياطي وأنه يتكلم مع القاضي في الجلسات لانه بيتجددله الحبس الاحتياطي وهو في قفص زجاجي معتم وعازل للصوت وتم إثباته في المحضر... النيابة لم تحقق في واقعة التهديد من رئيس المباحث.

-الزيارة انتهت وخرجنا من السجن الساعه ٧ تقريبا.

الحقيقة مش عارف ليه كل العذاب ده والتنكيل ده، ليه مصرين تسوودوها للأخر، مين المتخلف اللي فهمكم ان حبس اخويا والناس دي فيه مصلحة للبلد ولا لأي حد ولا ليكم في مصابكم؟ مين الأهل اللي قالكم ان بالتنكيل بالاھالي هيسكتوا ولو سكتوا مين اللي ضمنلكم نتائج ده هتكون عامله ازاى؟ اللي بيحصل ايا كان سببه جريمة في مسلسل طويل من الجرائم اللي مش باينلها نهاية ضد إسلام بداية من ٢٠١٥ و ٢٠١٦ ثم الان لما يقارب العام حبس إحتياطي وتنكيل

لسه مكتفتوش؟ ولا اكتفيننا مناصب على حساب حياة الناس وارواحهم؟ طب الغل اللي جواكم راح؟ مفيش اي مبرر للتنكيل المستهدف تجاه بعض الاسخاص اللي بيحصل ده واللي بيوسع كل يوم شكرا لكل الناس اللي بتظمن وبتسأل وبتكتب وبتنشر وبتحاول تساعد.

كل اللي عاوزينه لمحة واحدة للعدالة تصيبنا، كل اللي عاوزينه حرية إسلام وبس عجز وقهر وقلة حيلة يا صاحبي بس مفيش قدامنا غير المحاولة، واحنا سلميين فمعرفش غير الطرق السلمية، مرجعيتنا بالقانون اللي لا بيودي ولا بيحيب والعدالة المسحوقة بالبيادة، ولأجل ده مفيش قدامنا غير الصبر

بكرة بيخلص الكابوس <https://goo.gl/hLRGpn>

17 فبراير

**إبنة حمدي الفخراي**

وعمي راح النهاردة لبابا وقعد للساعة خمسة قبل المغرب وبرضو ما دخلش لبابا

كدة شهر ونص وحقنا وحقه في الزيارة ممنووووع

لا احنا كمان زيادة عن باقي السياسيين  
في ناس زارت في وجود حاجز زجاجي وبيتكلموا بسماعة تليفون وكدة/  
ولاده كمان اتسمح بيه معانا  
حد يا جماعة عارف بابا عمل ايه في مصر علشان بس اقول انه هو واحنا نستاهل؟؟؟  
<https://goo.gl/A1meJL>

## أم أسامة

كنت في الزياره امبارح في سجن طره لآخى وكانت اول  
زياره من اسبوعين وكان في شدة الزعل والبكاء من وفاة  
اخونا محمد امين لانه كان في الفرشه الا كانت جواره  
وبيقول انا كان جنبى ملاك مش انسان طيبه وحب وخوف  
على الناس وكان مهتم جدا بالناس الا في الايراد لان الناس  
دى بتيجى من اى مكان حالتهم سيئه فكان بيهتم بهم لا  
الزياره بتعتهم بتكون بعد فتره فكان كل اهتمامه بالناس دى  
وقبل الوفاه بيوم كان صايم ولكن قال لآخى انا مش قادر  
اكمل ففطر وتانى يوم ظهر عليه المرض والتعب وفجأه قاعد  
الالم يشتد عليه وهو ذاكر محتسب و مافيش على لسانه غير  
اشهد ان لا اله الا الله واشهد ان محمد رسول الله لحد مراح  
العياده الموضوع استغرق ٤٥ دقيقه ومافيش على لسانه غير  
الشهاده وهذا ادهش الجميع رحمك الله آخى الفاضل محمد  
الامين كلمه آخى مش عارفه انسها انه كان ملاك مش انسان  
نحسبه شهيد ان شاء الله وحسبنا الله ونعم الوكيل فى  
الظالمين

<https://goo.gl/LQdqWJ> حسبنا الله .. اللهم تقبله في الشهداء

21 فبراير

## عن شادي الغزالي حرب

انا روحت زيارة لشادي انهاردة من بدري حسب الاوامر..و مشيت بناء على رغبتى..ايوة..انا اللي طلبت  
اني امشي وانا بعيط كالعادة بعد ما انتظرت من ٩ و نص ل ٣ و نص و فهمت اني مش هزور انا بس جاية  
بدري عشان اتذل فترة اطول...شكرا  
<https://bit.ly/2V8Wkqg>

22 فبراير

### عن مصطفى النجار

147 يوم يا مصطفى ومازلت بعيد عنا لانعرف مكانك ولا نستطيع رؤيتك اللهم عجل برجوعه وحشتنا اوى وفي تفاصيل كثير في حياتنا محتاجينك تحلها محتاجين وجودك معنا والاطمئنان عليك ندعو الله دوما ان يحفظك ويردك لنا سالما معافي اللهم لاترينا فيه مكروه اللهم احفظه لأولاده فهم في أشد الاحتياج له مصطفى الحياه صعبه من غيرك وجودك يعنى الأمان يارب اللهم بحق حبك لحبيبك محمد عجل برجوع مصطفى لنا واحفظه بحفظك وكن له جار واحرسه بعينك التى لا تنام سهيل كل يوم يسألني بابا هيبجي أمتي كل شويه أقوله الشغل الولد خلاص زهق من الشغل وبيقولى خليه يسيب الشغل ده ويرجع يشتغل في العياده وانا عارف العياده بتاعه بابا وينفع اروحله فيها ويمنى الكبيرة فاهمه بس بتقولى كثير اوى كده انا محتاجه بابا عايزة أكلمه في حاجات كثير هو ليه بابا يحصل معاه كده وهنا مش بتتكلم كثير بس علطول خايفه من كل حاجه خايفه اوى على بابا وبابا وحشنى اوى ومفتقدها جدا يارب ليس لنا سواك نسألك ونلج عليك في السؤال ان تظمنا على مصطفى عاجلا غير آجل <https://bit.ly/2Nojeh1>



23 فبراير

### عن شادي الغزالي حرب

جلسة شادي كانت انهاردة الصبح.روح معهد الامناء عشان احاول اشوفه لكن طبعاً مدخلناش..قعدنا مرميين فالشارع في ريحة سيئة و جو قذر و مكان غير مهيء لاي شيء لحد الساعة ٤ لما الجلسة خلصت من غير ما ندخل بعد ما اتعاملنا معاملة الحيوانات من اللي واقعين عالباب هناك..ناس معذبة و متبهدة و جايين من المحافظات و منهم ناس عندهم سرطان و اللي جاي بعيال صغيرة و اللي كبير في السن..ممنوع عنهم الزيارة بقالهم سنين و بيتبهدلوا كل ده عشان يمكن يشوفوا ولادهم حتي لو في عربية الترحيلات لمدة ثانية..و بعد كل ده روحت بخيبة املي و احباطي و منتظرة القرار لكن للاسف محدش تمكن يجيبوا..نزلت النيابة الساعة ٩ و نص بليل ورا بيتي من كتر القلق قلت يمكن حد يدلني علي حاجة..طبعاً مفيش و الضباط هناك كانوا بيحاولوا يعاملوني بهدوء لكن طبعاً مستغربين مني ..و كله يرد نفس الرد..تعرفوا القرار بكرة..مش عارفين ان فيه اطفال بتعيط و امهات تعبانة و احنا كل ثانية بتعدي علينا نار و الليل بيعدي بالعذاب علي ما بكرة يبجي..انتوا مش حاسين بحاجة..انتوا بتعاملونا معاملة الكلاب..احنا مالناش اي تمن و لا حساب..مش كفاية سجن ظلم و عمر بيضيع..كمان ممنوع نشوفه..احنا بلد ملعونة والانسان فيها مالوش تمن..ربنا المنتقم الجبار و قلبي مش هيهدا غير لما شوف انتقام ربنا ..

<http://bit.do/eJSaR>